

LA EPÍSTOLA DEL APÓSTOL SAN PABLO A LOS ROMANOS

Salutación

1 Huēj gu'naj Pablo, tsínj huin apóstol garun nuguan' nan. Nĭ 'yaj sūnj rian Jesucristo. Nĭ gaquínj Jesucristo man'ānj sisi gahuin ninĭj ga'mī si-nuguan' Yan'anĭj rian ni ngüĭ aj. ²Nĭ hua gataj yya Yan'anĭj nuguan' daj rian ni tsínj ga'mi si-nuguan' Yan'anĭj asij ná. Nĭ garun ni sí' nuguan' daj rian yanĭj.

³Nĭ nuguan' daj a'mi xi'f da'nĭj Yan'anĭj huin Jesucristo, tsínj nicaj sun rian né'. Nĭ hué sij huin da'nĭj da'nĭ si'nĭj xi'f David ga'nga sij xungüĭ nan. ⁴Sani güenda niman sij, nĭ huin sij da'nĭj Yan'anĭj, gataj Espĭritu Santo huin Espĭritu sa'. Nĭ hua nucuaj sij, gataj Espĭritu Santo nej. Nĭ ni'i né' sisi nucuaj sij xi'f si ganá'nĭj sij scanĭj ni níman, gui'yaj Yan'anĭj anĭj.

⁵Nĭ xi'f Jesucristo gui'yaj Yan'anĭj 'ngō sinduj rian ni únĭj sisi ga'mi únĭj nuguan' sa' daj rian ni ngüĭ. Hué dan nĭ nga daran' ni xungüĭ man chruhua xungüĭ guĭman ni ngüĭ xuman ruhua nĭ'yaj Jesucristo. Nĭ xi'f si 'ĭ ruhua ni sij ni'yaj ni sij sí', nĭ dagahuin ni sij si-nuguan' sí' nej. ⁶Nĭ gaquínj Yan'anĭj man'an ni é re'

nej sisi guĭnicaj dugüĭ' a ni é re' nga Jesucristo.

⁷Nĭ a'nĭ nuguan' nan rian daran' ni é re' man xuman' Roma. Nĭ 'ĭ ruhua Yan'anĭj ni'ya a ni é re'. Nĭ gaquínj Yan'anĭj ni é re' sisi gahuin sa' niman án re'. Nĭ huin ruhuāĭ sisi Yan'anĭj huin chré' nga Señor Jesucristo gui'yaj sinduj rian án re'. Nĭ gahuin din'inĭj ruhua ni é re', ruhuāĭ aj.

Deseo de Pablo de visitar a Roma

⁸Hua sini nĭ a'uiĭj si guruhua Yan'anĭj rian xi'f a ni é re'. Nĭ hué daj a'mī xi'f Jesucristo. Daj si nĭn' gachra' a'mi ni ngüĭ daj xuman ruhua ni é re' ni'yaj ni é re' Jesucristo aj. ⁹Nĭ 'yaj sūnj rian Yan'anĭj a'mī si-nuguan' da'nĭ Jesucristo rian ni ngüĭ. Nĭ xi'f daj ni'i Yan'anĭj sisi ya'yoj nun ruhuāĭ ni'inĭj ni é re' ngaa achínĭj jni'yā rian Yan'anĭj. ¹⁰Nĭ achínĭj jni'yā rian Yan'anĭj sisi ga'uej ruhua Yan'anĭj, nĭ ga'ue guĭsi rian man a ni é re' aj. ¹¹Daj si huin ruhuāĭ guĭni'inĭj ni é re', nĭ chracuĭj yun'un 'ngō nuguan' sa' güenda niman ni é re'. Ngaa nĭ gahuin nĭca niman ni é re' nga si-chrej Yan'anĭj, ruhuāĭ aj. ¹²Ngaa nĭ

ngaa nari' dugüi' né', ni nari' nucuj niman né' xi'í si xuman ruhua né' ni'í né' Jesucristo. ¹³Ni huin ruhuāj si guini'í a ni é re' sisi ga'í gahuin ruhuāj gan'anj ni'yā rian man ni é re' huin ni é re' jnān nga xica'ui. Sani asij acuan' na'ue si guisi rian man án re' si hua 'ngo rasun 'yaj. Daj si huin ruhuāj si gahuin nucuj chruhua niman ni é re', gui'yaj si-nuguan'ānj. ¹⁴Ni hua nian si ga'mi nuguan' sa' rian ni ngüi a'mi snan'anj griego nga ni ngüi a'mi ango snan'anj nej. Ni hua nian si ga'mi nuguan' sa' rian ni ngüi chrun sa' nga ni ngüi nitaj si chrun nej aj. ¹⁵Xi'í daj ni huin ruhuāj sisi rá'yanj guiman né' ga'mi si-nuguan' Yan'anj rian a ni é re' man xuman' Roma aj.

El poder del evangelio

¹⁶Nitaj si huin na'ā nga nuguan' sa' xi'í Cristo mánj. Daj si nuguan' daj huin si nucuj nin' ruhua xi'í si nacaj Yan'anj ni ngüi xuman ruhua ni'yaj Jesucristo. Ni huin ruhua man'an Yan'anj nācaj sinij ni ngüi israelita. Sani huin ruhua Yan'anj nāca ni ngüi 'na' anéj chrej nej. ¹⁷Ni xi'í si xuman ruhua né' ni'yaj né' Yan'anj, ni digyán nuguan' sa' daj sisi 'yaj nica Yan'anj nga né'. Ni 'yaj Yan'anj daj sisi guxuman ruhua né' ni'yaj né' Jesucristo. Ni hué daj garun ni tsínj ga'mi si-nuguan' Yan'anj asij ná. Ni gataj ni sij: “Hua nica ruhua ni tsínj xuman ruhua ni'yaj Jesucristo. Ni gane niganj ni sí' nga Yan'anj aj.” Daj gataj ni sij.

La culpabilidad del hombre

¹⁸Ni hua digyán Yan'anj rian né' sisi a'man ruhua Yan'anj ni'ya

daran' si xi'í 'yaj ni ngüi. Ni hué daj a'man ruhua Yan'anj ni'ya ni tsínj nitaj si 'yaj nica nej. Daj si arij huí ni sij nuguan' xanga' güenda si acaj ni sij ango chrej quij hua achéj ni sij. ¹⁹Daj si hua ni'í yya ni sij daran' nuguan' ga'ue guini'í né' xi'í Yan'anj si hua digyán yya Yan'anj ni nuguan' daj chruhua niman ni sij. ²⁰Ni na'ue guini'í rian né' Yan'anj mánj. Sani asij gui'yaj Yan'anj xungüi, ni guini'í yya ni ngüi daj nucuj man'an Yan'anj. Ni guini'í ni sij xi'í ni rasun nico gui'yaj Yan'anj. Ni xi'í daj sisi gataj ni sij sisi nun ni'í ni sij Yan'anj, ngaa ni tsínj nne huin ni sij. Daj si hua guini'í ni sij daran' rasun gui'yaj Yan'anj aj.

²¹Ni nunj si guini'í ni sij daj hua Yan'anj, sani nun gataj ni sij sisi hua sa' Yan'anj mánj. Ni na'uej ruhua ni sij ga'ui' ni sij si guruhua Yan'anj nej. Sani si ani ruhua ni sij nitaj si ní'yanj mánj. Ni hua rumi' niman ni sij 'yaj si nunun ni sij. ²²Ataj ni sij si chrun sa' ni sij. Sani huin ni sij tsínj ni'yun. ²³Sani nun yan'anj ni sij ni yan'anj gui'yaj ra'a ni sij. Ni daj rún' hua 'ngo tsínj nga xataj nej, xucu nun gan'anj ra'a nej, xucu aca riqui rian yo'ój huin yan'anj gui'yaj ra'a ni sij. Ni xi'í si hué daj 'yaj ni sij, ni gani ruhua ango ni ngüi sisi hué daj hua man'an Yan'anj xanga' nej.

²⁴Xi'í daj ni ga'nin' ruhua Yan'anj sisi gui'yaj quij ni sij daj rún' garan' ruhua ni sij, gui'yaj ni sij. Ngaa ni gui'yaj ni sij ni rasun hua na'aj nga ni man'an ni dugüi' ni sij. ²⁵Ni nuguan' xanga' 'na' rian Yan'anj, ni nun xuman ruhua ni sij. Sani nano' ni sij nuguan' yya. Ni nun yan'anj ni sij nico' ni sij ni rasun gui'yaj

Yan'anj. Sani nitaj si guinico' ni sij man'an Yan'anj mánj. Ni hua nian si ga'mi sa' né' niganj nin' xi'í Yan'anj. Amén.

²⁶Xi'í daj ni ga'nin' ruhua Yan'anj sisi gui'yaj quij ni sij nga ni rasun hua na'aj daj rún' garan' ruhua ni sij. Daj si duna ni yun'unj xana si ga'mi unj nga nica unj. Ni daj rún' 'yaj 'ngo yun'unj ngaa a'mi unj nga 'ngo tsínj, hué daj gui'yaj unj ga'mi unj nga dugüi' unj. ²⁷Ni hué daj gaxi'i gui'yaj ni tsínj nej. Daj si duna ni sij si ga'mi ni sij nga nica ni sij. Ni nin' ruhua huin ruhua ni sij ga'mi ni sij nga ni dugüi' ni sij nej. Ni gui'yaj ni sij 'ngo rasun na'aj nga ango ni tsínj huin dugüi' ni sij. Ni rian xi'í gaquin' daj huin guiran' ni sij castigo güenda si duna ni sij si-chrej Yan'anj.

²⁸Ni rian na'uej ruhua ni sij xacaj ni sij cuenta xi'í Yan'anj, ni ga'nin' ruhua Yan'anj si gani quij ruhua ni sij. Xi'í daj ni gui'yaj ni sij ni rasun si ga'ue gui'yaj né'. ²⁹Ni nun ni nuguan' quij chruhua niman ni sij xi'í si nitaj si 'yaj nica ni sij nga dugüi' ni sij. Ni huin ruhua ni sij gui'yaj squira' ni sij nga dugüi' ni sij. Ni nun nuguan' xi'i chruhua niman ni sij nej. Ni huin ruhua ni sij si-'yaj dugüi' ni sij. Ni nun nuguan' hua quij chruhua niman ni sij. Ni xicoj ruhua ni sij nej. Ni dagahui' ni sij níman nej. Ni unun' ni sij nga ni dugüi' ni sij. Ni digya' yun'unj ni sij ni dugüi' ni sij. Ni 'yaj ni sij ango ni rasun quij hua nej. ³⁰Ni a'mi quij ni sij xi'í ango ni dugüi' ni sij. Ni nun huin xan' ni sij ni'yaj ni sij Yan'anj. Ni nunun ni sij si a'mi dugüi' ni sij. Ni nne nin' ruhua ni sij. Ni huin

yaj ruhua ni sij nga dugüi' ni sij. Ni nano' ni sij 'ngo chrej quij hua. Ni nun ráj xina ni sij rian chrej ni sij nga nni ni sij. ³¹Tsínj ni'yun huin ni sij. Ni nun síj ni sij nga si-nuguan' ni sij. Ni nitaj si 'i ruhua ni sij ni'yaj ni sij go'ngo ni dugüi' ni sij. Ni nun ni'i ni sij guinicaj ni sij 'ngo niman nico. Ni na'ue gani yaco ruhua ni sij ni'yaj ni sij ni dugüi' ni sij. ³²Ni nunj si ni'i sa' ni sij sisi gahuin castigo ni ngüi 'yaj ni gaquin' daj, gui'yaj Yan'anj, sani hua gue 'yaj ni sij gaquin' daj. Ni huin nia' ruhua ni sij ni'i ni sij si 'yaj ango dugüi' ni sij gaquin' daj.

El justo juicio de Dios

2 Nitaj si gui'ya sisi un tsínj huín re'. Sisi utá' re' gaquin' dugüi' re', ni da'ui man'án re' gaquin' nej aj. Sisi atáj re' si da'ui dugüi' re' gaquin', sani utá' re' gaquin' man'án re' nej. Daj si uyan 'yaj man'án re' gaquin' nga dugüi' re'. ²Ni ni'i né' sisi dugu'naj huaj sisi gui'yaj Yan'anj castigo ni tsínj 'yaj ni rasun quij. Daj si xanga' man'an Yan'anj. ³Ni sisi utá' re' gaquin' ni dugüi' re' ngaa hué daj 'yaj man'án re' nej, ngaa ni si gani ruhuá re' si guinani re' rian si-castigo Yan'anj mánj. ⁴Ni nunj si huin sa' ruhua Yan'anj ni'yáj re', ni 'uee nin' ruhua huin ruhua Yan'anj ni'yáj re' nej, ni a'nin' ruhua Yan'anj ni'ya re' nej, sani nitaj ducúanj nicáj re' ga'mi re' rian Yan'anj mánj. Ni nun ni'í re' sisi daran' ni nuguan' sa' daj 'yaj Yan'anj nga re' huin güenda si ganani ruhuá re' xi'í si-gaquin' re'. ⁵Ni rian nunún re', ni na'uej ruhuá re' ganani ruhuá re' xi'í si-

gaquin' re', nī naanj sa' utá' re' doj gaquin' xiráj re' güi ga'na' Yan'anj gui'ya castigo ni ngüi aj. Nī hua nīca daran' si gui'yaj Yan'anj guini'i ni ngüi. ⁶Nī daj nīca gui'yaj go'ngo né' chruhua xungüi nan, nī hué daj gui'yaj Yan'anj nga né'.

⁷Nī gui'yaj Yan'anj sisi gane niganj ni tsínj dugu'nun' gui'yaj sa' ni sij nga dugüi' ni sij. Daj si nano' ni sij gane 'ueé ni sij nga Yan'anj. Nī huin ruhua ni sij gahuin sa' ni sij rian Yan'anj. Nī gane niganj ni sij nga Yan'anj, ruhua ni sij. ⁸Sani ga'man ruhua Yan'anj gui'ya castigo ni tsínj nunun si na'uej ruhua ni sij gunun ni sij nuguan' xanga'. Daj si unun' ni sij nga ni dugüi' ni sij. Nī huin ruhua ni sij gache ni sij chrej quij hua. ⁹Nī daran' ni tsínj 'yaj gaquin', sani guiran' ni sij 'ngo sayun nico. Nī ganani nico ruhua ni sij. Nī hué daj guiran' sini ni tsínj israelita. Sani guiran' sayun ni tsínj 'na' anéj chrej nej.

¹⁰Sani ni ngüi 'yaj sa', nī guiman sa' ni sij rian Yan'anj. Nī gahuin din'inj ruhua ni sij nej. Nī ga'mi sa' ni ngüi xi'f ni sij nej. Nī hué daj gahuin sini nga ni tsínj israelita. Nī uyan gahuin nga ni tsínj 'na' anéj chrej nej. ¹¹Daj si uyan hua daran' né' rian Yan'anj.

¹²Nī hua go'ngo ni ngüi 'yaj gaquin' ngaa nitaj si ni'i ni sij si-ley Moisés. Nī gahui' ni sij ngaa achin guini'i ni sij ley daj. Nī hua ango ni ngüi 'yaj gaquin' ngaa ni'i ni sij si-ley Moisés. Ngaa nī gahuin ni sij castigo rún' ataj ley daj. ¹³Nitaj si gataj Yan'anj si hua nīca niman né' xi'f si unun né' si-ley Moisés. Maan si gataj Yan'anj si hua nīca

niman né' xi'f si 'yaj né' si ataj ley daj. ¹⁴Nī man ni tsínj 'na' anéj chrej nitaj si-ley Moisés nicaj ni sij. Sani ngaa 'yaj ni sij daj rún' ataj ley daj, nī nunj si nitaj ley nicaj ni sij, sani a'mi niman ni sij si gui'yaj sa' ni sij rian Yan'anj. ¹⁵Nī hué daj digyán ni sij sisi nun ley daj chruhua niman ni sij, gui'yaj Yan'anj xanga'. Nī hua 'ngo yun, nī a'mi niman ni sij si da'ui ni sij gaquin' xi'f si gui'yaj ni sij. Nī ango yún, nī a'mi niman ni sij sisi nitaj gaquin' da'ui ni sij. ¹⁶Nī hué daj gahuin güi gui'yaj Yan'anj nga Jesucristo castigo xi'f ni nuguan' garij huí ni ngüi. Nī gui'yaj Yan'anj daj rún' hua nīca nuguan' a'mi rian ni ngüi.

Los judíos y la ley

¹⁷Nī atáj re' si hué re' huin 'ngo tsínj israelita. Nī ani ruhua re' sisi gahuin sa' re', gui'yaj si-ley Moisés. Nī xi'f daj nicaj dugüf' re' nga Yan'anj, ruhua re' aj. ¹⁸Nī ni'f re' si aran' ruhua Yan'anj. Nī digyán si-ley Yan'anj 'ngo chrej sa' rían re'. Nī ga'ue nacui re' 'ngo chrej sa' gan'anj re', ruhua re'. ¹⁹Nī ani ruhua re' sisi hué re' huin 'ngo tsínj ga'ue digyán chrej rian ni ngüi na'ue guini'i si-nuguan' Yan'anj. Nī ani ruhua re' sisi ga'ue guixiguin rian ni ngüi achéj rian hua rumi' hua, gui'yáj re' nej. ²⁰Nī ga'ue digyán re' rian ni ngüi ni'yun, ruhua re'. Nī ga'ue digyán re' rian ni tsin', ruhua re' nej. Daj si ani ruhua re' sisi xi'f si digui'yún re' si-ley Moisés, nī ga'ue gahuin chrún re' daran' nuguan' xanga'. ²¹Nī sisi so' huin 'ngo si digyán rian ni ngüi, nī un sin huin, nī na'ue digyán re' rian man'án re' únj. Sisi hué re'

nata' rian ni ngüi sisi si gui'yaj tu né', ni un sin huin ni 'yaj tu man'án re' únj. ²²Ni atáj re' sisi si ga'ue ga'mi hui né' nga nica dugüi' né'. Sani un sin huin ni a'mi hui man'án re' nga nica dugüi' re' únj. Ni atáj re' si nun huin xan' ruhua re' ni'yáj re' ni yan'anj 'yaj ra'a ni ngüi. Sani un sin huin ni 'yaj tu re' ni rasun man chruhua ni nuhui man ni yan'anj da únj. ²³A'mi nne re' xi'í si nicáj re' si-ley Moisés. Sani rian nun dagahuín re' si ataj ley daj, ni nitaj si nun yan'ánj re' Yan'anj mánj. ²⁴Hué daj xanga' ni hua nica rian yanj daj garun ni tsínj ga'mi si-nuguan' Yan'anj asij ná. Ni gataj ni sij: "Xi'í si nitaj si 'yaj sa' ni é re', ni a'mi quij ni ngüi 'na' anéj chrej xi'í Yan'anj anj." Daj gataj ni sij.

²⁵Xanga' yya sisi dagahuín re' si ataj si-ley Moisés, ni hua yya ní'yanj sisi guta' ni sij da'nga' nnee cúj re'. Sani sisi nitaj si dagahuín re' si ataj ley daj, ni rún' huaj sisi nun guta' ni sij da'nga' daj. ²⁶Hué dan ni sisi hua 'ngo tsínj nitaj si taj da'nga' nnee cúj sij, sani 'yaj si daj rún' ataj si-ley Yan'anj, ngaa ni gahuin sij rún' huin 'ngo tsínj taj da'nga' daj, ruhuáj aj. ²⁷Ni hua 'ngo tsínj dagahuin si ataj si-ley Yan'anj. Ni nunj si nun guta' ni sij da'nga' nnee cúj sí', sani digyán sí' sisi da'ui man'án re' gaquin' xi'í si 'yaj sa' sí'. Ni nun dagahuín re' si ataj si-ley Yan'anj nunj si nicáj re' si-ley Yan'anj. Ni guta' ni sij da'ngá' re' nej.

²⁸Sé tsínj israelita huin né' nga xi'í si gui'yaj né' nga nnee cúj né' mánj. Ni sé urin ne' chrej xe' né' taj da'nga' da mánj. ²⁹Sani ngaa taj

da'nga' daj, ni huin ruhuaj gata sisi niman né' hua nini rian Yan'anj. Ni tsínj hua nini rian Yan'anj, ni hué sí' huin xanga' 'ngo tsínj israelita. Ni sé si-ley Moisés 'yaj da mánj. Sani Espiritu Santo 'yaj sisi hua nini sij rian Yan'anj. Ni si ruhuaj ni nitaj si ga'mi sa' ni ngüi xi'í tsínj hua nini daj. Sani a'mi sa' Yan'anj xi'í sij aj.

3 Hua sa' si huin né' tsínj israelita ní'. Ni hua sa' si taj da'nga' nnee cúj né' ní'. ²Hua sa' xangaj. Hua sini gatā rián re' sisi asij ná, ni ga'ui' Yan'anj si-nuguan'anj rian ni tsínj israelita aj. ³Ni hua da'aj ni tsínj israelita nun dagahuin rian Yan'anj. Ngaa ni huin ruhuaj gata sisi nitaj sica' Yan'anj únj. ⁴Sé daj huin mánj. Daj si niganj 'yaj Yan'anj daran' si hua nica xanga' nunj si a'mi yya daran' ni ngüi. Daj si gataj yya si-nuguan' Yan'anj:

Hua nian si guini'i ni ngüi sisi hua yya si a'mi si-nuguan' re' huín re' Yan'anj.

Ni hua nian si gui'yaj ganá re' ngaa a'mi ni ngüi sisi nitaj si 'yaj sa' re' mánj.

Hué daj garun ni tsínj ga'mi si-nuguan' Yan'anj asij ná.

⁵Ni sisi digyán si-gaquin' 'yaj né' sisi hua nica 'yaj Yan'anj, ngaa ni daj gataj né' únj. Gataj né' sisi nitaj si 'yaj nica Yan'anj si gui'ya castigo né' ní'. (A'mi daj rún' a'mi ni ngüi aj.) ⁶Sé daj huin mánj. Sisi hué daj huin, ni daj ga'ue naguei'yaj yya Yan'anj nga si-gaquin' ni ngüi man chruhua xungüi, ruhua re' únj. ⁷Ni ango nuguan' huin sisi si-nuguan'anj digya' yun'unj 'yaj sisi ga'mi sa' ni ngüi xi'í si 'yaj sa' Yan'anj, ngaa ni un sin huin, ni

gui'yaj Yan'anj castigo yūnj únj. ⁸Ni ga'ue gataj né' (sisi gui'yaj né' doj gaquin', ngaa ni ga'na' si sa' rian né'. Sani nuguan' nan huin nuguan' yya si a'mi go'ngo ni ngüi. Ataj ni sij sisi hué daj digyán ni únj rian ni ngüi.) Sani sé daj huin mánj. Ni sa' huin si gui'yaj Yan'anj castigo ni ngüi a'mi nuguan' yya da aj.

No hay justo

⁹Hué dan ni hua sa' ni únj huin ni únj ni tsínj israelita daj nga ango ni ngüi, ruhua re' ní'. Sé daj huin mánj. Daj si hua gatā sisi da'ui daran' né' gaquin'. Uyan da'ui ni tsínj israelita gaquin' nga ni tsínj 'na' anéj chrej nej. ¹⁰Ni hué daj gataj si-nuguan' Yan'anj nej:

Nitaj a 'ngo ni ngüi 'yaj nica mánj.

¹¹Nitaj a 'ngo ngüi ráj da'nga' ruhua mánj.

Ni nitaj a 'ngo ngüi nano' Yan'anj mánj.

¹²Ni duna daran' ni sij si-chrej Yan'anj.

Ni 'ngo hua nuguan'an daran' ni sij nitaj si ní'yanj rian Yan'anj.

Ni nitaj a 'ngo ngüi 'yaj sa' mánj.

¹³Ni daj rún' guin' rian achin' níman, ni da'nga' daj hua nuguan' ahui du'ua ni sij a'mi ni sij.

A'mi snan'anj ni sij nga yya ni sij.

Ni daj rún' hua nnee xunaj nun du'ua xucuáj, hué daj hua nuguan' ahui du'ua ni sij.

¹⁴Ni maan ninanj nuguan' chre a'mi ni sij.

Daj si nun huin xan' ruhua ni sij ní'yaj ni sij dugüi' ni sij.

¹⁵Ni yoo ni sij gan'anj dagahui' ni sij níman.

¹⁶Ni nin' ruhua ran' ni ngüi sayun, 'yaj ni sij.

¹⁷Ni nun guini'i ni sij chrej 'yaj si gahuin din'inj ruhua ni sij mánj.

¹⁸Ni nitaj si xu'ui' ni sij rian Yan'anj mánj.

Hué daj gataj si-nuguan' Yan'anj xi'f ni sij.

¹⁹Ni ni'i né' sisi a'nin' si-ley Yan'anj sun rian ni tsínj nico' ley daj. Ni si-ley Yan'anj 'yaj sisi dínj gahuin du'ua daran' ni ngüi xi'f si ni'i ni sij sisi da'ui ni sij gaquin'. Ni ni'i daran' né' sisi hua nian gui'yaj Yan'anj castigo ni ngüi 'yaj gaquin', 'yaj ley da nej. ²⁰Ni a 'ngo né' nun guisij dagahuin daran' si a'nin' ley da mánj. Ni na'ue gahuin so' rian Yan'anj, gui'yaj ley da mánj. Ní'yanj si-ley Yan'anj urin si xacaj né' cuenta sisi da'ui né' gaquin' rian Yan'anj anj.

La justicia es por medio de la fe

²¹Sani yyaj ni digyán nini Yan'anj ango chrej sa' rian ni ngüi sisi daj ga'ue gahuin nica ruhua niman né'. Ni hua yya sisi digyán si-ley Yan'anj nga si garun ni tsínj ga'mi si-nuguan' Yan'anj asij ná daj hua chrej da nej. ²²Ni chrej daj gataj sisi hua nica niman né' xi'f si xuman ruhua né' ni'yaj né' Jesucristo. Ni hué daj gahuin nga daran' ni ngüi xuman ruhua ni'yaj Jesús. Daj si uyan huin daran' ni ngüi rian Yan'anj anj. ²³Daj si daran' ni ngüi gui'yaj gaquin'. Ni achin si gahuin sa' ni sij rian Yan'anj. ²⁴Ni gui'yaj Yan'anj 'ngo sinduj xxi rian né'. Daj

si naru'ue Jesucristo man'an sí' xi'f si-gaquin' né'. Xi'f daj, n̄i gahuin sa' né' rian Yan'anj anj. ²⁵N̄i gui'yaj Yan'anj si naránj si-tun man'an Jesucristo rian si-gaquin' né'. N̄i xi'f si gayanj si-tun man'an Jesús, n̄i ga'ue guinicaj Yan'anj 'ngo niman nico rian si-gaquin' né' huin né' ni ngüi xuman ruhua ni'yaj Jesús. N̄i nuguan' nan digyán sisi hua n̄ica ruhua Yan'anj. Daj si ga'nin' ruhua Yan'anj nun gui'yaj-á' castigo ni ngüi guimán asij ná. ²⁶N̄i xi'f si gahui' Jesucristo, n̄i digyán Yan'anj yyaj rian né' sisi hua n̄ica ruhua Yan'anj. N̄i xi'f si gui'yaj Jesucristo, n̄i gataj Yan'anj sisi hua sa' niman ni ngüi xuman ruhua ni'yaj Jesús.

²⁷Ngaa n̄i si ga'ue gataj né' sisi 'yaj sa' né' rian Yan'anj mánj. Daj si sé xi'f si dagahuin sa' né' rian si-ley Moisés 'yaj si hua sa' chruhua niman né' mánj. San̄i hua guxuman ruhua né' ni'i né' Cristo. N̄i xi'f daj hua sa' chruhua niman né' rian Yan'anj anj. ²⁸Hué dan n̄i ga'ue gataj né' sisi hua sa' niman né' rian Yan'anj xi'f si xuman ruhua né' ni'yaj né' Jesús. N̄i gui'yaj Jesús sisi hua sa' niman né' rian Yan'anj ngaa hua guē achin dagahuin sa' né' si-ley Yan'anj. ²⁹N̄i sé urin Dan'anj ni ngüi israelita huin Yan'anj mánj. San̄i hué guē Yan'anj huin Dan'anj ango ni ngüi 'na' anéj chrej. N̄i ni'i sa' né' sisi ga'ue n̄acaj Yan'anj ni ngüi 'na' anéj chrej nej. ³⁰Daj si urin Yan'anj hua rian né': N̄i sisi guxuman ruhua ni ngüi israelita ni'yaj ni sij Jesús, n̄i gataj Yan'anj sisi hua sa' niman ni sij. N̄i sisi guxuman ruhua ni ngüi 'na' anéj chrej ni'yaj ni sij Jesús, n̄i gataj Yan'anj sisi hua sa' niman ni sí' nej.

³¹Hué dan n̄i ataj ni únj sisi nitaj si ni'yanj si-ley Yan'anj, ruhua á re' ní'. Sé daj huin mánj. Maan si ataj únj sisi ngaa guxuman sa' ruhua né' ni'yaj né' Jesús, ngaa n̄i ga'ue dagahuin sa' né' si-ley Yan'anj nej aj.

El ejemplo de Abraham

4 Ngaa n̄i un sin huin gataj né' si guiri' xí' Abraham tsínj gane asij ná únj. ²N̄i sisi hua n̄ica niman Abraham xi'f si gui'yaj sa' sí', ngaa n̄i ga'ue ga'mi xacan sí' xi'f man'an sí'. San̄i sé daj huin rian Yan'anj mánj. ³N̄i gataj rian si-nuguan' Yan'anj: “Guxuman ruhua Abraham ni'i sij Yan'anj. N̄i xi'f daj gataj Yan'anj sisi hua sa' niman sij.” Daj gataj si-nuguan' Yan'anj.

⁴N̄i ngaa 'yaj sun 'ngo tsínj daj rian 'ngo xuru'ue, n̄i da'ui sí' rian tsínj 'yaj sun daj. N̄i sé 'ngo sinduj huin naru'ue sí' güenda 'yaj sun sij mánj. ⁵San̄i ga'ue gataj Yan'anj sisi hua sa' niman né' xi'f si xuman ruhua né' ni'yaj né' Jesús nunj si achin gui'yaj sa' né' rian Yan'anj anj.

⁶N̄i hué daj ga'mi xí' David xi'f 'ngo tsínj achin gui'yaj sa'. San̄i hua gataj Yan'anj sisi hua sa' niman tsínj daj. N̄i ga'mi David sisi hua 'ueé rian tsínj daj. ⁷N̄i gataj David: Hua 'ueé rian tsínj rian xi'i si-gaquin' si guinicaj Yan'anj 'ngo niman nico.

N̄i nun xacaj Yan'anj cuenta xi'f si-gaquin' sij mánj.

⁸N̄i hua 'ueé rian tsínj rian nun acaj cuenta Yan'anj xi'f si-gaquin' sij.

Hué daj gataj David.

⁹Ngaa n̄i sé urin ni tsínj israelita ga'ue gahuin niá' ruhua nga nuguan'

nan. Sanĭ ga'ue gahuin niā' ruhua ni tsínj 'na' anéj chrej nej. Daj si hua gata rian án re' sisi hua sa' niman Abraham gataj Yan'anĭ xi'í si xuman ruhua sij ni'yaj sij Yan'anĭ.

¹⁰Nĭ nachínj snan'ān ni é re'. Nĭ aman gataj Yan'anĭ si hua nĭca niman Abraham, ruhua ni é re' únj. Asij ne' rucu guta' ni sij da'nga' nnee cúj Abraham ní'. Asĭ asij sini sa'. Hué asij sini huin anĭ. ¹¹Nĭ ne' rucu huin guta' sij da'nga' nnee cúj man'an sij. Nĭ é' huin 'ngo da'nga' digyán Yan'anĭ sisi hua sa' niman Abraham xi'í si guxuman ruhua sij ni'yaj sij Yan'anĭ. Ngaa nĭ ga'ue gahuin Abraham chrej daran' ni tsínj xuman ruhua ni'yaj Yan'anĭ nunĭj si nun guta' da'nga' nnee cúj ni tsínj daj. Nĭ hué daj ga'ue gataj Yan'anĭ si hua sa' niman ni tsínj daj huin ni tsínj 'na' anéj chrej. ¹²Nĭ ga'ue gahuin Abraham chrej ni tsínj hua guta' da'nga' man'an ni sij. Nĭ hué daj huin sisi guxuman ruhua ni sij daj rún' guxuman ruhua Abraham ngaa achin guta' da'nga' sí' nej.

La promesa realizada mediante la fe

¹³Nĭ ga'nĭj du'ua Yan'anĭ rian ni da'nĭj Abraham sisi ga'ui'-í' xungüi nan nahuin ra'a ni sij. Sanĭ sé güenda si dagahuin Abraham si-ley Moisés huin sisi hué daj gataj Yan'anĭ nuguan' nan gunun ni sij mánj. Sanĭ gataj Yan'anĭ sisi hua sa' niman Abraham xi'í si guxuman ruhua sí' ni'yaj sí' man'an Yan'anĭ anĭ. ¹⁴Nĭ sé xi'í si dagahuin ni tsínj si-ley Moisés 'yaj si nahuin ra'a ni sij xungüi nan mánj. Daj si sisi hué daj huin, nĭ nitaj si ní'yanĭ si xuman

ruhua ni sij ni'yaj ni sij Yan'anĭ mánj. Nĭ nitaj si ní'yanĭ nuguan' hua gataj yya Yan'anĭ gunun ni sij mánj. ¹⁵Daj si si-ley Moisés 'yaj sisi gahuin ni ngüi castigo. Sanĭ sisi nitaj ley daj, nĭ nitaj si da'ui ni ngüi gaquin' mánj.

¹⁶Hué dan nĭ xi'í si xuman ruhua né' ni'yaj né' man'an Yan'anĭ, nĭ nahuin ra'a né' nuguan' xanga' gui'yaj yya Yan'anĭ nga ni da'nĭj Abraham. Hué dan nĭ xacaj né' cuenta nga xi'í sinduj gui'yaj Yan'anĭ nga né'. Nĭ sé urin rian ni ngüi dagahuin ley daj gui'yaj yya Yan'anĭ. Sanĭ gui'yaj yya Yan'anĭ rian daran' ni ngüi xuman ruhua ni'yaj Yan'anĭ daj rún' guxuman ruhua xi' Abraham. Nĭ hué sí' huin chrej daran' né'. ¹⁷Daj si gataj si-nuguan' Yan'anĭ: “Gui'yā sisi gahuín re' chrej nico rian ni ngüi.” Daj gataj Yan'anĭ gunun Abraham. Ngaa nĭ gahuin sí' chrej daran' né' rian Yan'anĭ. Nĭ guxuman ruhua sí' ni'yaj sí' Yan'anĭ. Nĭ Yan'anĭ 'yaj sisi gana'nĭj ni níman. Nĭ 'yaj Yan'anĭ ni rasun achin si gurugüi' aj.

¹⁸Nĭ ngaa gachin güi ruhua Abraham si gui'yaj sa' Yan'anĭ nga sij, nĭ hua gue guxuman ruhua sij ni'yaj sij Yan'anĭ. Nĭ xi'í si hué daj gui'yaj sij, nĭ gahuin sij “chrej nico ni ngüi”. Daj si hua gataj Yan'anĭ gunun sij: “Hué daj guixi'nanĭ nico da'nĭj re'.” ¹⁹Nĭ nun ga'nin' ruhua Abraham si guxuman ruhua sij ni'yaj sij Yan'anĭ (nunĭj si achin doj guisĭj sij 'ngo ciento yo'). Nĭ acaj sij cuenta sisi achin doj gahui' nungüeĭ nica sij Sara. Nĭ gachin yo' ga'nga da'nĭj nica sij Sara nej. ²⁰Nĭ nun gani huiĭ ruhua sij nga nuguan'

gataj yya Yan'anj gunun sij. Sani guxuman doj ruhua sij ni'yaj sij Yan'anj. Ni ga'mi sa' 'ueé sij rian Yan'anj. ²¹Ni gani sa' ruhua sij sisi nicaj Yan'anj fuerza gui'yaj-á' daran' ni nuguan' hua gataj yya-á' gunun sij.

²²Ni xi'í si guxuman ruhua sij ni'yaj sij Yan'anj, ni gataj Yan'anj sisi hua sa' niman sij. ²³Ni garun ni sij sisi hua sa' niman Abraham gataj Yan'anj. Sani sé rian urin Abraham huin garun ni sij da mánj.

²⁴Sani garun ni sij nuguan' daj xi'í né' xi'í si xuman ruhua né' ni'yaj né' Yan'anj. Ngaa ni gataj Yan'anj sisi gahuin sa' niman né' nej. Ni Yan'anj gui'yaj sisi ganá'nij Jesús huin sí' Señor nicaj sun rian né'.

²⁵Ni naga'ui' Yan'anj man'an sí' sisi gahui' sí' xi'í si-gaquin' né'. Ni ganá'nij sí', gui'yaj Yan'anj güenda si ga'tue gataj Yan'anj sisi hua sa' niman né'.

Resultados de la justificación

5 Hué dan ni xi'í si guxuman ruhua né' ni'yaj né' Jesucristo, ni gahuin sa' niman né' rian Yan'anj. Ni hua din'inj ruhua né' rian Yan'anj, 'yaj Jesucristo huin sí' Señor nicaj sun rian né'. ²Ni xi'í si xuman ruhua né' ni'yaj né' Jesucristo, ni nahuin ra'a né' sinduj 'yaj Yan'anj nga né'. Ni hua nica ruhua né', 'yaj sinduj daj. Ni hua nia' ruhua né' ana'uij né' sisi gahuin sa' 'ueé né' nga Yan'anj. ³Ni ango nuguan' huin sisi huin nia' ruhua né' ngaa ran' né' sayun. Daj si ni'i né' sisi nari' nucuj doj niman né', 'yaj sayun daj. ⁴Ni ngaa gahuin nucuj niman né', ni guisij

né' gahuin nica ruhua né' nej. Ni ngaa guisij né' gahuin nica ruhua né', ni ana'uij né' sisi gui'yaj sa' Yan'anj nga né'. ⁵Ni sé 'ngo nuguan' yun huin si ana'uij né' nan mánj. Daj si gahuin nucuj niman né' xi'í si nin' ruhua 'i ruhua Yan'anj ni'ya né'. Ni Espíritu Santo 'yaj sisi ni'i né' daj. Ni Yan'anj riqui si ga'na' Espíritu Santo rian né'.

⁶Ni ngaa nun gahuin nucuj né' gui'yaj sa' né', ni xi'í né' gahui' Cristo. Ni gahuin né' tsínj nun guxuman ruhua ni'yaj Yan'anj. Ni gahui' Cristo güi ngaa gani sini ruhua Yan'anj. ⁷Ni hua yya na'uej ruhua né' gahui' né' xi'í 'ngo dugüi' né' tsínj hua sa' niman. Sani si ruhuaj, ni gahui' 'ngo né' xi'í 'ngo tsínj hua sa' nin'. ⁸Sani sé daj huin Yan'anj mánj. Daj si ngaa hua gue da'ui né' gaquin', ni gahui' Cristo xi'í', gui'yaj Yan'anj. Ni hué daj digyán yya Yan'anj sisi 'i ruhua Yan'anj ni'ya né'.

⁹Ngaa ni xi'í si gahuin sa' niman né', gui'yaj si-tun man'an Cristo, hué dan ni ni'i né' sisi si gahuin né' castigo xi'í gaquin' da'ui né' güi ga'na' Yan'anj gui'ya castigo ni ngüi mánj. ¹⁰Ni ngaa gahuin né' tsínj unun' nga Yan'anj, ni gahui' da'ni xi'í né'. Ni hué daj nagui'yaj yya Yan'anj nga né'. Hué daj ni nanj ga'tue ncaj xanga' Yan'anj né' xi'í si hua ni'na' Cristo nne sij chruhua niman né'. ¹¹Ni sé urin nan, sani huin nia' ruhua né' nga Yan'anj xi'í Jesús huin sí' Señor nicaj sun rian né'. Daj si hué xi'í Cristo, ni hua din'inj ruhua né' rian Yan'anj anj.

Adán y Cristo

¹²Hué dan ni urin tsínj daj gui'yaj si gatúj gaquin' chruhua xungüi

gu'naj sí' Adán. Ní gaxi'i gahui' ni ngüi' ngaa gatúj gaquin' chruhua xungüi. Ní daran' ni ngüi' gahuin si gahui' xi'í si da'ui daran' ni sij gaquin'. ¹³Ní asij nun ga'ui' Yan'anj ley rian ni ngüi, ní hua gui'yaj ni sij gaquin'. Sani' nun xacaj Yan'anj cuenta xi'í gaquin' ngaa nitaj ley hua mánj. ¹⁴Ní asij gane Adán, ní da' yo' gane Moisés, ní gahui' ni ngüi. Ní nun dagahuin Adán 'ngo nuguan' gataj Yan'anj gunun sij. Sani' sé daj huin si-gaquin' ni ngüi' gahui' daj. Ní nun gui'yaj sa' Adán.

Hué dan ní daj rún' ga'na' Adán, ní hué daj hua nian ga'na' ango tsínj gui'yaj sa' chruhua xungüi nan anj. ¹⁵Sani' sé rún' hua si-gaquin' Adán sé daj hua sinduj si riqui Yan'anj rian né' mánj. Daj si gahui' ni ngüi' mán nín' gachra' xi'í gaquin' gui'yaj Adán. Sani' riqui Yan'anj 'ngo sinduj rian né' huin né' ni ngüi' mán nín' gachra'. Daj si ga'ui' Yan'anj si ga sa' né'. Ní hué daj gui'yaj Yan'anj xi'í sinduj gui'yaj urin tsínj daj xi'í né' huin sí' Jesucristo. ¹⁶Ní daj rún' gahuin gui'yaj urin tsínj daj gaquin', ní sé daj hua sinduj riqui Yan'anj rian né' mánj. Daj si xi'í urin gaquin' gui'yaj si gahuin ni ngüi' castigo. Sani' xi'í sinduj riqui Yan'anj rian né', ní gataj Yan'anj sisi' hua nica niman né' rian daran' ni gaquin' gui'yaj né' aj. ¹⁷Ngaa ní xi'í si-gaquin' urin tsínj daj, ní ahui' daran' ni ngüi, 'ya. Sani' xi'í si riqui Yan'anj sinduj rian né', ní gataj Yan'anj si hua nica niman né'. Ngaa ní ga'ue ga nì'na' né' guinicaj sun niganj né', gui'yaj urin tsínj huin Jesucristo aj.

¹⁸Hué dan ní si-gaquin' urin Adán gui'yaj sisi' gahuin daran' ni ngüi'

castigo. Sani' xi'í si gui'yaj sa' 'ueé urin Jesucristo, ní gui'yaj-á' sisi' ga'ue ga nica niman daran' ni ngüi. Ní ga'ue 'ngo ga nì'na' ni sij nej. ¹⁹Ní xi'í si nun dagahuin urin tsínj daj rian Yan'anj, ní gahuin daran' ni ngüi' ni tsínj da'ui gaquin'. Sani' xi'í si dagahuin urin ango tsínj daj rian Yan'anj, ní gahuin sa' nico ni ngüi' rian Yan'anj anj.

²⁰Ní ga'ui' Yan'anj ley rian ni ngüi' sisi' guini'i ni sij sisi' hua nico gaquin' da'ui ni sij rian Yan'anj. Sani' ngaa gui'yaj ni ngüi' nico gaquin', ní naanj nico gui'yaj Yan'anj sinduj rian ni sij aj. ²¹Hué dan ní guiran' ni ngüi' sayun xi'í gaquin' gui'yaj ni sij. Sani' xi'í sinduj riqui Yan'anj rian né', ní hua nica niman né'. Ní ga'ue gane niganj nín' né' xi'í si gahui' Jesucristo huin sí' Señor nica' sun rian né'.

Muertos al pecado

6 Hué dan ní un sin huin gui'yaj né', ruhua á re' únj. Ga gue gui'yaj né' gaquin' güenda si riqui Yan'anj doj sinduj rian né', ruhua á re' ní'. ²Sé daj huin gui'yaj né' mánj. Daj si rún' huin 'ngo níman gahui' na'ue gui'yaj gaquin' daj huin né'. Ngaa ní si ga'ue ga gui'yaj né' gaquin' ga mánj. ³Hua nian si guini'i a ni é re' sisi' ngaa gata' nnee né', ní guinicaj dugüi' né' nga Cristo Jesús. Ní rún' huin níman gahui' nuguan'an nga Cristo daj huin né' nga sij. ⁴Ní rian gata' nnee né', ní huin ruhuaj gata sisi' gahui' nuguan'an né' nga Cristo. Ní gachin' nuguan'an né' nga sij nej. Hué dan ní daj rún' ganá'nij Cristo, gui'yaj si-fuerza Yan'anj, hué daj ní ga'ue

nahuin naca gane né' nej. ⁵Ni sisi guinicaj dugüi' né' nga Cristo gahui' né' daj rún' gahui' sij, ni hué ducuánj daj gana'nij né' daj rún' ganá'nij sij.

⁶Ni ni'i né' sisi daj gui'yaj né' gaquin' asij sini. Ni gahui' nuguan'an si gui'yaj né' daj nga Cristo. Xi'í daj guere' fuerza nicaj gaquin' gui'yaj sini né'. Hué dan ni nitaj si huaj gui'yaj sun né' rian gaquin' da ga mánj. ⁷Daj si daj rún' na'ue gui'yaj 'ngo níman gaquin' hué daj si ga'ue gui'yaj né' gaquin' ga mánj. ⁸Ni sisi gahui' nuguan'an né' nga Cristo, ngaa ni xuman ruhua né' sisi gane nuguan'an né' nga sij nej. ⁹Hua ganá'nij Cristo scanij ni níman. Hué dan ni ni'i né' sisi si ga'ue gahui' ruhua' yún sij mánj. Hua gui'yaj gana Cristo rian nuguan' da aj. ¹⁰Ni urin yun xi'i gahui' Cristo xi'í gaquin'. Sani ganá'nij sij. Ni nne sij 'yaj sij si aran' ruhua Yan'anj anj. ¹¹Ni hué ducuánj daj huin si gani ruhua a ni é re' sisi gahui' si xi'i man niman án re'. Ni daj rún' huin níman huin a ni é re' na'ue gui'yaj ni é re' gaquin' ga mánj. Sani gani ruhua ni é re' sisi hua ni'na' ni é re' rian Yan'anj xi'í si nicaj dugüi' ni é re' nga Cristo Jesús, tsínj nicaj sun rian né'.

¹²Hué dan ni si ga'nij ni é re' chrej sisi gahuin achij gaquin' rian nnee cúj ni é re' mánj. Daj si ni'i né' sisi gahui' nnee cúj né'. Ni si dagahuin ni é re' si huin ruhua gui'yaj nnee cúj ni é re' ga mánj. ¹³Ngaa ni si naga'ui' a ni é re' nnee cúj ni é re' rian gaquin' güenda gui'yaj-á' nga ni rasun quij hua. Sani naga'ui' ni é re' niman ni é

re' rian Yan'anj. Ni gani ruhua á re' sisi huin ni é re' ni ngüi gahui', ni ganá'nij ruhua' yún nej. Ni naga'ui' a ni é re' nnee cúj ni é re' rian Yan'anj sisi ga'ue gui'yaj sa' á re' daj rún' aran' ruhua Yan'anj anj. ¹⁴Hué dan ni si ga'ue guinicaj gaquin' fuerza rian ni é re' ga mánj. Daj si nitaj si nicaj sun si-ley Moisés rian ni é re' mánj. Sani 'nij ni é re' riqui sinduj 'yaj Yan'anj rian án re' aj.

Siervos de la justicia

¹⁵Hué dan ni sisi nitaj si nicaj sun ley rian né' xi'í si 'nij né' riqui sinduj 'yaj Yan'anj, ni ga'ue gui'yaj né' gaquin', ruhua á re' ní'. Sé daj huin mánj. ¹⁶Ni ni'i sa' né' sisi ngaa aráj xina né' gui'yaj sun né' rian 'ngo xuru'ue, ni hué né' gahuin si gunánj guitsi rian sí'. Ni hué ducuánj daj huin sisi gunánj guitsi né' rian gaquin', ngaa ni gahui' né'. Sani sisi unánj guitsi né' rian Yan'anj, ni gahuin sa' niman né' rian Yan'anj anj. ¹⁷Ni hué ni é re' gahuin sini ni ngüi unánj guitsi rian gaquin'. Sani a'ui' únj si guruhua Yan'anj sisi yyaj, ni dagahuin xanga' ni é re' si-nuguan' Yan'anj digyán únj rian ni é re'. ¹⁸Asij sini gunánj guitsi a ni é re' rian gaquin'. Sani yyaj ni gahuin nini ni é re' rian gaquin' güenda si gunánj guitsi ni é re' rian nuguan' nica, gui'yaj Yan'anj. ¹⁹(Ni hué daj a'mi xi'í si na'ue gunun sa' ni é re' nuguan' nan.) Ni asij sini ni garáj xina ni é re' sisi gui'yaj nnee cúj ni é re' gaquin'. Ni maan ninanj gaquin' gui'yaj á re' rian Yan'anj. Sani yyaj ni naga'ui' ni é re' nnee cúj ni é re' rian Yan'anj. Ni hué daj ga'ue

gui'yaj nica ni é re'. Ngaa ni gahuin ni é re' ni ngüi 'yaj sa' rian Yan'anj nej aj.

²⁰Ni ngaa huin ni é re' ni ngüi unánj guitsi rian gaquin', ni nun ga'uej ruhua á re' gui'yaj nica ni é re' rian Yan'anj. ²¹Ni un sin huin gui'yaj gana a ni é re' nga ni gaquin' gui'yaj ni é re', ruhua á re' únj. Yyaj ni ri' ni é re' si-na'aj nga ni gaquin' gui'yaj á re' daj. Daj si ni gaquin' daj 'yaj si gahui' né', gui'yaj Yan'anj. ²²Yyaj ni gahuin nini ni é re' rian ni gaquin' daj. Ni unánj guitsi ni é re' rian Yan'anj. Xi'í daj gahuin sa' ruhua ni é re' rian Yan'anj. Ni gane niganj nin' ni é re' nga Yan'anj nej. ²³Hué dan ni xi'í gaquin' 'yaj ni ngüi, ni 'ngo gahuin anéj niman ni ngüi rian Yan'anj. Sani sinduj riqui Yan'anj rian né' 'yaj si gane niganj nuguan'an né' nga Cristo Jesús huin Señor nicaj sun rian né'.

Analogía tomada del matrimonio

7 Hué dan ni ni'i ni é re' daj hua si-ley Yan'anj huin ín re' jnān nga xica'ui. Ni ni'i sa' ni é re' sisi a'nin' ley daj sun rian né' urin ngaa hua ni'na' né' mán né' chruhua xungüi nan. ²Gui'yó' cuenta sisi hua 'ngo yun'unj xana xacaj tsínj sno'o. Ni ley daj ataj sisi hua nian si gane unj nga nica unj ngaa nin' hua ni'na' sí'. Sani sisi gahui' nica unj, ni nitaj si a'nin' ley sun rian unj ga mánj. Ga'ue xacaj unj ango tsínj sno'o. ³Hué dan ni sisi xacaj unj ango tsínj sno'o ngaa nin' nne nica unj, ni da'ui unj gaquin'. Sani sisi gahui' nica unj, ni hua nini rian unj nga si a'mi ley daj. Ni ga'ue xacaj unj ango tsínj sno'o. Ni sé 'ngo gaquin' huin mánj.

⁴Ni hué daj huin nga ni é re' huin ín re' jnān nga xica'ui. Daj si ngaa gahui' nuguan'an ni é re' nga Cristo, ngaa ni gahuin nini ni é re' rian si-ley Moisés. Ni guinicaj dugüi' ni é re' nga Cristo. Yyaj ni huin ni é re' Cristo, tsínj ganá'nij scanij ni niman. Xi'í daj ni ga'ue gui'yaj sa' né' rian Yan'anj. ⁵Daj si asij sini mán né', ni gahuin ruhua né' gui'yaj né' gaquin', gui'yaj ley daj xi'í si hua ya' rian ley si gui'yaj né' ni gaquin' daj. Hué dan ni ruhua gahui' né' xi'í gaquin' gui'yaj né' nga nnee cúj né'. ⁶Sani yyaj ni nitaj si 'nij né' riqui si-fuerza ley da ga mánj. Ni hua ní'nij rian né' dagahuin né' rian Yan'anj gache né' 'ngo chrej naca si riqui Espíritu Santo rian né'. Ni nitaj si 'nij né' riqui ley garun ni sij asij ná.

El pecado que mora en mí

⁷Hué dan ni gataj né' sisi si-ley Yan'anj huin gaquin' ní'. Sé daj huin mánj. Sani gui'yaj ley sisi guini'inj daj hua gaquin'. Ni ataj ley: “Si gahuin ruhua né' ni'yaj né' si'yaj dugüi' né'.” Hué dan ni sisi nitaj ley daj, ni nitaj aman guini'inj daj hua gahuin ruhuāj ni'yā si'yaj dugüi'ij. ⁸Sani rian hua ya' rian ley si gui'yaj né' gaquin', ni gaxi'i gani ruhuāj gui'yā ni rasun nitaj si hua sa'. Ni sisi nitaj ley, ni nun xacaj ni ngüi cuenta daj hua gaquin'. ⁹Ni asij sini ngaa nun guini'i sa'āj si-ley Yan'anj, ni gani ruhuāj sisi 'ngo tsínj sa' gahuinj. Sani ngaa gunun sa'āj nuguan' a'nin' Yan'anj sun riānj, daj guini'inj sisi da'uij gaquin'. Ni nin' ruhua gui'yā gaquin'. ¹⁰Ni guini'inj sisi nitaj si hua sa' nimánj.

Ni ley daj huin güenda si guiman sa' ni ngüi chruhua xungüi. Sani xacaj cuentaj sisi huinj 'ngo tsínj 'yaj gaquin'. Ni guere' nimānj, gui'yaj ley daj. ¹¹Ni ngaa xacaj cuentaj daj hua si-ley Yan'anj, ni gahuin ruhuāj gui'yā daj rún' gataj ley daj. Sani digya' yun'unj gaquin' man'ānj. Ni gahuinj 'ngo tsínj guere' nimānj.

¹²Hué dan ni hua sa' nin' si-ley Yan'anj nga nuguan' a'nin' Yan'anj sun rian né'. Ni hua nica nuguan' nan nej. Ni dugu'naj hua nuguan' nan nej. ¹³Xi'í nuguan' sa' nan, ni guere' nimānj, ruhua á re' ní'. Sé daj huin mánj. Sani guere' nimānj xi'í si da'uuj gaquin'. Ni garasun gaquin' rian nuguan' sa' daj. Ni xi'í daj xacaj cuentaj sisi quij nin' ruhua hua gaquin' daj.

¹⁴Ni ni'í né' sisi uyan a'mi si-ley Yan'anj nga Espíritu Santo. Sani yūnj huin 'ngo tsínj 'yaj sun rian gaquin'. ¹⁵Daj si nga si 'yā, ni nitaj si 'yā nga si huin ruhuāj gui'yā. Maan si 'yā si nun huin xan' ruhuāj 'yā, ni 'yā nánj. ¹⁶Hué dan ni sisi 'yā si nun huin xan' ruhuāj 'yā, ni acaj cuentaj sisi hua sa' si-ley Yan'anj. ¹⁷Hué dan ni huin ruhuaj gata sisi sé man'ānj huin si 'yaj daj. Sani gaquin' nun chruhua nimānj huin si 'yaj aj.

¹⁸Ni xi'í si a'nin' gaquin' sun riānj, ni nitaj 'ngo nuguan' sa' nun chruhua nimānj. Daj si nunj si huin ruhuāj gui'yā si sa' hua, sani na'ue gunucuā gui'yā mánj. ¹⁹Nitaj si 'yaj sa'āj si huin ruhuāj gui'yā mánj. Sani hua gue 'yā si nun huin xan' ruhuāj gui'yā nánj. ²⁰Hué dan ni sisi 'yā si nun huin xan' ruhuāj 'yā, ni sé man'ānj huin si 'yaj. Sani

gaquin' nun chruhua nimānj huin si 'yaj nánj. ²¹Ngaa ni acaj cuentaj sisi ngaa huin ruhuāj gui'yā si sa' hua, sani hua gue nari'ij gaquin' 'yā.

²²Ruhua nimānj ni aran' ruhuāj ni'yā si-ley Yan'anj. ²³Sani ni'inj sisi unun' ango ley nga nimānj. Ni hué ley daj huin si nicaj sun chruhua nimānj. Ni ango ley daj huin gaquin' 'yaj nnee cúj man'ānj.

²⁴Ducu niqiu nimānj xi'í si guere' nimānj, 'yaj gaquin'. Ni un tsínj ga'ue gui'yaj si ganani rian gaquin' a'nin' chruhua nimānj nan únj.

²⁵A'uí si guruhua Yan'anj sisi xi'í Jesucristo, ni ga'ue guinani né' rian gaquin'. Ni Jesucristo huin Señor nicaj sun rian né'.

Hué dan ni yyaj ni'inj sisi dagahuin sta'ngāj rian si-ley Yan'anj. Sani dagahuin nnee cū si ataj gaquin' nun chruhua nimānj anj.

Viviendo en el Espíritu

8 Hué dan ni si guta' Yan'anj gaquin' xiráj ni ngüi nicaj dugüi' nga Cristo Jesús. Daj si achéj ni sij si-chrej Espíritu Santo. Ni nitaj si achéj ni sij daj rún' ataj nnee cúj ni sij. ²Daj si asij sini, ni ninanj gaquin' gui'yaj né'. Ni ruhua guere' niman né', gui'yaj gaquin' daj. Sani gahuin ní'nij né' rian gaquin' daj, gui'yaj Espíritu Santo. Ni Espíritu Santo 'yaj nga Cristo Jesús sisi ga ni'na' niganj né' gane né'. ³Ni xi'í si hua nucuaj gaquin' 'yaj nnee cúj né', ni na'ue gunucuaj si-ley Yan'anj naca né'. Sani man'an Yan'anj huin si nucuaj ga'ue ncaj né'. Daj si ga'nij man'an Yan'anj da'ni ga'na' chruhua xungüi. Ni daj rún' hua nnee cúj né' gahuin sí'. Ni

gahui' sí' xi'í si-gaquin' né'. Ní hué ducuanj daj gui'yaj gana sí' rian gaquin' gui'yaj nnee cúj né'. ⁴Ní hué daj gui'yaj Yan'anj güenda sisi ga'ue dagahuin né' si a'nin' si-ley Yan'anj sun rian né'. Daj si nitaj si dagahuin né' si a'nin' gaquin' rian né' ga mánj. Sani dagahuin né' si a'mi Espiritu Santo chruhua niman né' aj.

⁵Ní ni ngüi dagahuin si huin ruhua nnee cúj ni sij, ní maan si nahuij ruhua ni sij nga nuguan' quij a'nin' rian ni sij. Sani ni ngüi dagahuin si a'nin' Espiritu Santo chruhua niman ni sij, ní nahuij ruhua ni sij nga nuguan' a'nin' Espiritu Santo rian ni sij. ⁶Ní sisi nahuij ruhua né' urin nga si huin ruhua nnee cúj né', ní gahui' niman né', gui'yaj. Sani sisi nahuij ruhua né' nga nuguan' 'na' rian Espiritu Santo, ní gui'yaj-á' sisi hua din'inj rian né'. Ní gane niganj né' nga Yan'anj nej. ⁷Ní sisi ninanj nahuij ruhua né' nga si huin ruhua nnee cúj né', ní unun' né' nga Yan'anj. Ní na'uej ruhua né' dagahuin né' si-ley Yan'anj. Ní si gunucuj né' dagahuin né' ley da mánj. ⁸Ní ni ngüi nahuij ruhua nga si huin ruhua nnee cúj ni sij, ní na'ue gui'yaj ni sij daj rún' aran' ruhua Yan'anj.

⁹Ní sisi hua yya nne Espiritu Santo chruhua niman ni é re', ní nitaj si nahuij ruhua ni é re' nga si huin ruhua nnee cúj ni é re' ga mánj. Sani nahuij ruhua á re' nga si huin ruhua Espiritu Santo gui'yaj á re'. Ní sisi nitaj si nne Si-Espiritu Cristo chruhua niman 'ngo tsínj daj, ngaa ní nitaj si huin sí' Cristo mánj.

¹⁰Sani sisi nne yya Cristo chruhua niman né', ní gahui' yya nnee cúj né' xi'í gaquin' gui'yaj né'. Sani hua ní'na' niman né' xi'í si gataj Yan'anj si hua nica niman né'. ¹¹Ní ganá'nij Jesús scanij ni níman, gui'yaj Yan'anj. Xi'í daj sisi nne Espiritu Santo chruhua niman né', ní ga ní'na' nnee cúj né', gui'yaj Yan'anj. Daj si nne Espiritu Santo chruhua niman né'.

¹²Hué dan ní nitaj si huaj si gui'yaj né' si huin ruhua nnee cúj né'. Si chracuij né' si huin ruhua nnee cúj né' man huin ín re' jnān nga xica'ui. ¹³Daj si sisi gui'yaj né' daj rún' huin ruhua nnee cúj né', ní gahui' né'. Sani sisi dagahuin né' nuguan' a'mi Espiritu Santo chruhua niman né', ní duna né' gaquin' 'yaj nnee cúj né'. Ní ga ní'na' niman né' gane niganj né' nga Yan'anj. ¹⁴Daran' ni ngüi garaj xina sisi digyán Espiritu Santo chrej rian ni sij, ní hué ni sij huin da'nij Yan'anj anj. ¹⁵Nitaj si huin ruhua Yan'anj sisi guxu'ui' né' rian Yan'anj daj rún' 'yaj 'ngo tsínj ngaa 'yaj sun yun sij rian 'ngo xuru'ue huee. Sé daj huin mánj. Sani huin ruhua Yan'anj guini'i né' sisi huin né' da'ni. Ní hua nia' ruhua Yan'anj sisi gataj né': "Tata chré", rian Yan'anj. ¹⁶Ní hué Espiritu Santo nicaj dugüi' nga niman né'. Ní ataj-á' unun' né' sisi huin né' da'nij Yan'anj. ¹⁷Hué dan ní xi'í si huin né' da'nij Yan'anj, ngaa ní nahuin ra'a né' daran' si riqui Yan'anj rian né'. Ní daj rún' ganahuin ra'a Cristo rian Yan'anj, ní hué daj ganahuin ra'a né' nej. Ní sisi guiran' nuguan'an né' sayun nga Cristo, ngaa ní gahuin 'ueé sa' né' nga sij nej.

¹⁸Ni hua yya ran' né' sayun xungüi nan. Sani rian gahuin 'ueé sa' né' ango xungüi ga'na', ngaa ni xi'í daj ani ruhuāj sisi sé si nico huin sayun ran' né' acuan' mánj. ¹⁹Ni ana'uuij nin' ruhua daran' ni rasun man chruhua xungüi daj gahuin 'ueé sa' né' huin né' da'níj Yan'anj. ²⁰Ni daran' ni rasun man chruhua xungüi gahuin xi'ij. Sani sé daj huin ruhua ni rasun gui'yaj Yan'anj mánj. Sani man'an Yan'anj gui'yaj sisi hué daj huaj gahuin xi'i daran'anj. Ni ana'uuij daran'anj sisi nagui'yaj naca Yan'anj daran'anj. ²¹Ni 'na' güi ngaa gahui sa' daran'anj. Ni nitaj si guchru ni rasun ga mánj. Ni ana'uuij sa' daran'anj sisi ganahuin 'ueé sa' daran'anj daj rún' ganahuin 'ueé sa' né' huin né' da'níj Yan'anj.

²²Ni ni'i né' sisi daj rún' ran' 'ngo yun'unj xana sayun ngaa achin ga'nga da'níj unj, ni hué daj ran' daran' ni rasun man chruhua xungüi. ²³Ni sé urin ni rasun daj ran' sayun, sani ran' né' sayun nej. Ni ana'uuij né' si gahuin naca daran'anj. Ni riqui sini Yan'anj Espiritu Santo gane nga né'. Ni xi'í daj ana'uuij né' sisi riqui Yan'anj ango ni rasun sa' rian né' nej. Ni ni güi man né' xungüi nan, ni nani ruhua né' da gahuin yya né' da'níj Yan'anj. Daj si ngaa ganahuij xungüi nan, ni nagui'yaj 'ueé Yan'anj nnee cúj né'. ²⁴Hua ganacaj Yan'anj né'. Sani ana'uuij né' sisi gui'yaj sa' Yan'anj nga né'. Ni sisi hua guini'i né' ga'na' 'ngo rasun ana'uuij né', hué dan ni nitaj si ana'uuij né' si ga'na' ruhua' yún rasun daj rian né' ga mánj. Nitaj si huaj si gana'uuij né' rasun hua nicaj né' mánj. ²⁵Ni nun

ni'i né' si gui'yaj Yan'anj nga né'. Ni sisi achin guini'i né' si ana'uuij né', sani nanaj gana'uuij né' si gui'yaj sa' Yan'anj nga né' aj.

²⁶Ni rian ninaj niman né', ni chracuij Espiritu Santo né'. Daj si nun ni'i né' daj gachinj jni'yaj né' rian Yan'anj. Sani achinj jni'yaj nin' ruhua Espiritu Santo xi'í né' rian Yan'anj. Ni ataj Espiritu Santo rian Yan'anj nga nuguan' huin ruhua né' ga'mi né'. ²⁷Ni ni'i sa' Yan'anj daj huin ruhua niman né'. Ni ni'i sa' Yan'anj daj huin ruhua Espiritu Santo nej. Ni daj rún' aran' ruhua Yan'anj, ni hué daj achinj jni'yaj Espiritu Santo xi'í né' huin né' ni ngüi sa' rian Yan'anj anj.

Más que vencedores

²⁸Ni ni'i né' sisi xi'í ni ngüi i ruhua ni'yaj Yan'anj, ni chracuij Yan'anj sisi ga sa' ni sij nga daran' si ran' ni sij. Ni hua gani ruhua Yan'anj sisi gaquinj-ín' ga'na' ni ngüi daj guinicaj dugüi' ni sij nga Yan'anj. ²⁹Ni asij ná hua ni'i Yan'anj né'. Ni gani ruhua Yan'anj sisi gahuin né' daj rún' huin man'an da'níj Yan'anj huin sí' Jesús. Ngaa ni gahuin sí' tsinj xahua' scanij nico ni jnánj sí' huin né'. ³⁰Ni asij sini ni gani ruhua Yan'anj sisi gaquinj-ín' guinicaj dugüi' né' nga-á'. Ni gataj Yan'anj sisi hua nica niman né' rian Yan'anj nej. Ni rian gataj Yan'anj sisi hua nica niman né', ni gui'yaj-á' sisi gahuin 'ueé sa' né' nga-á' nej.

³¹Sisi daj huin, ni ga'ue gataj né' sisi nicaj dugüi' Yan'anj nga né'. Ni nitaj si gahuin sisi gataj ruhua ni ngüi guini'i ni sij né' mánj. ³²Ni ga'nin' ruhua Yan'anj sisi guiran'

da'ni sayun gahui' sí' xi'f né'. Nì sisi riqui Yan'anj da'ni rian né', nì ga'ue gahuin yya ruhua né' sisi riqui Yan'anj daran' ni nuguan' sa' rian né' nej. ³³Nì rian hua nacui Yan'anj né', nì nitaj si gahuin si ga'mi gaquin' ni ngüi xi'f né' ga mánj. Daj si hua gataj Yan'anj sisi hua nica niman né'. ³⁴Nì rian hua gahui' Cristo Jesús xi'f si-gaquin' né', nì nitaj si gahuin si gataj ni ngüi sisi da'ui né' gaquin' mánj. Nì ganá'nij Jesús nej. Nì nne sí' ra'a sa' Yan'anj. Nì achínj jni'yaj sí' rian Yan'anj xi'f né' aj.

³⁵Nì ducu ì ruhua Cristo ni'ya né'. Ngaa nì daj hua nuguan' ga'ue gui'yaj sisi gahuin nini né' rian Cristo, ruhua á re' únj. Ngaa ran' né' sayun ní', asì ngaa nun ri' ruhua né' si gui'yaj né' ní', asì ngaa a'mi quij ni ngüi rian né' ní', asì ngaa achin xi'ná riqui né' ní', asì ngaa achin atsij gunun né' ní', asì ngaa achéj né' chrej sayun ní', asì ngaa ataj ni ngüi sisi dagahui' ni sij né' sa'. Sanì nga daran' ni nuguan' nan, nì sù duna Cristo si ì ruhua sij ni'yaj sij né'. ³⁶Nì hué daj ga'mi si-nuguan' Yan'anj nej. Nì gataj nuguan' daj:

Ya'yoj huin ruhua ni sij dagahui' ni sij ni únj xi'f man'án re' huín re' Yan'anj.

Nì daj rún' huin xachij gahui' daj huin ni únj, ruhua ni sij. Hué daj gataj si-nuguan' Yan'anj.

³⁷Nì nunj si ran' né' daran' sayun nan, sanì gui'yaj gana né' xi'f si ì ruhua Cristo ni'yaj sij né'.

³⁸Nì ì ruhua Yan'anj ni'ya né'. Nì gahuin yya ruhuāj sisi güi yyaj, asì ni güi ga'na', nì sù ga'ue gahuin nini né' rian Yan'anj mánj. Nitaj

si gahuin si gahui' né'. Nì nitaj si gahuin si hua ni'na' né' nej. Nì si ga'ue gui'yaj ni ángel nga ni nane xi'i sisi ga'nij ra'a Cristo né' mánj. Nì si ga'ue gui'yaj gana ni yan'anj 'yaj ra'a ni ngüi rian né' nej. ³⁹Nì si ga'ue gui'yaj ni si mán xata' nga ni si man rian yo'ój sisi ga'nij ra'a Cristo né' mánj. Nì a 'ngo ni rasun gui'yaj Yan'anj si ga'ue gui'yaj sisi ga'nij ra'a Yan'anj né'. Daj si ì ruhua Yan'anj ni'ya né'. Nì hué daj ì ruhua Cristo Jesús ni'ya né' huin sí' Señor nicaj sun rian né'.

La elección de Israel

9 Nì nico' man'ānj Cristo. Nì nitaj si utaj chrā nuguan' ga'mi rian án re'. Nì nne Espíritu Santo chruhua nimānj. Nì a'mi Espíritu Santo chruhua nimānj sisi nuguan' a'mi nan huin nuguan' xānga'. ²⁻³Nì ni' xānga' nimānj sisi niganj nìn' ruhua nani ruhuāj xi'f ni dugüi'ij huin ni ngüi israelita. Nì huin ì ruhuāj ni'yā ni ngüi daj. Nì nìn' ruhua huin ruhuāj sisi nacaj Yan'anj ni dugüi'ij. Nì ga'uej ruhuāj gahuin niganj nìn'inj castigo, gui'yaj Yan'anj xi'f ni sij. Nì ga'uej ruhuāj sisi gahuin anē rian Cristo sisi hué chrej daj ga'ue nacaj Yan'anj ni dugüi'ij. ⁴Nì huin ni sij ni tsínj israelita. Nì gui'yaj Yan'anj sisi gahuin ni sij da'nij Yan'anj. Nì gane 'ueé Yan'anj scanij ni sij. Nì gui'yaj yya Yan'anj 'ngo nuguan' sa' nga ni sij. Nì ga'ui' Yan'anj si-ley-é' rian ni sij. Nì digyán Yan'anj daj gui'yaj ni sij ngaa nahuin yu' ni sij. Nì gataj Yan'anj sisi sa' gui'yaj-á' nga ni sij. ⁵Nì huin ni sij ni da'nij ni xi' guimán asij ná. Nì yan sa' ni ngüi

israelita huin Cristo huin sí' Yan'anj nicaj sun rian daran'anj. Nì niganj ga'mi sa' né' xi'í Cristo. Amén.

⁶Nì sé si xanga' nun guisij nuguan' gataj yya Yan'anj rian ni ngüi israelita. Daj si xi'í si nun dagahuin da'aj ni sij rian Yan'anj, nì sé si xanga' daran' ni da'níj Israel huin yya tsínj israelita. ⁷Nì sé si xanga' daran' ni da'nì si'nì Abraham huin yya da'níj sí'. Daj si gataj Yan'anj gunun sí': "Nì da'nì si'nì re' ga'na' rian tsínj gu'naj Isaac." Daj gataj Yan'anj gunun xi'í Abraham. ⁸Nì nuguan' nan huin ruhuaj gata sisi sé daran' ni ngüi ga'nga rian xi'í Abraham huin da'níj Yan'anj. Sanì urin ni ngüi xuman ruhua si-nuguan' Yan'anj hué ni sij huin yya ni da'níj Abraham. ⁹Daj si nuguan' nan huin nuguan' gataj yya Yan'anj gunun Abraham: "Ango yo' nãnicaj yünj, ni guñicaj nicã re' Sara 'ngo lij." Daj gataj Yan'anj gunun Abraham.

¹⁰Nì ango nuguan' huin sisi xi'í Isaac huin urin chrej nungüej lij da'níj Rebeca huin unj nicã sí'. ¹¹⁻¹²Nì ngaa achin ga'nga nungüej li, nì ngaa achin gui'yaj nungüe si sa', asi sé si sa', sanì hua gataj Yan'anj rian Rebeca sisi lij ga'nga sini hué-é' dagahuin sun rian ango lij ga'nga ne' rucu. Nì maan si nacui Yan'anj 'ngo sí' gahuin sí' tsínj gahuin achij rian jnánj sí' xi'í si hua gani sini ruhua Yan'anj ðaj ga sun nicaj go'ngo nungüe rian Yan'anj. ¹³Nì nuguan' nan gataj Yan'anj: "Huin 'i ruhuãj ni'ya tsínj gu'naj Jacob. Sanì nun huin xan' ruhuãj ni'ya tsínj gu'naj Esaú mánj." Daj gataj Yan'anj.

¹⁴Hué dan nì gataj né' sisi nitaj si hua nica niman Yan'anj, ruhua

á re' ní'. ¹⁵Daj si gataj Yan'anj rian Moisés: "Nì ðaj rún' aran' ruhuãj, nì hué ðaj gui'yã nacuij ni ngüi sisi nani yaco ruhuãj guini'yã. Nì hué ðaj gui'yã nahuin 'i ruhuãj guini'yã nej." Daj gataj Yan'anj.

¹⁶Nì na'ue gui'yaj ni ngüi sisi nacui Yan'anj ni sij xi'í si hué ðaj huin ruhua ni sij, asi sisi gui'yaj fuerza ni sij. Sanì urin si nahuin 'i ruhua Yan'anj ni'yaj-á', nì nacui Yan'anj ni sij.

¹⁷Daj si hua gataj Yan'anj gunun rey gu'naj Faraón: "Hué man'anj gui'yaj sisi huín re' rey. Nì xi'í man'án re' digyãnj ðaj nucuã rian daran' ni ngüi man chruhua xungüi. Nì guini'i ni sij ðaj hua man'anj nej." Daj gataj Yan'anj gunun Faraón asij ná.

¹⁸Hué dan nì ni'í né' sisi nani yaco ruhua Yan'anj ni'yaj-á' un tsínj huin ruhua-á'. Nì 'yaj Yan'anj sisi na'uej ruhua ango tsínj ðaj dagahuin sij.

¹⁹Sanì si ruhuaj gataj da'aj ni é re': "Daj ga'ue ga'mi gaquin' Yan'anj xi'í ni ngüi sisi ninanj 'yaj né' si huin ruhua Yan'anj únj." Daj gataj da'aj ni é re', si ruhuaj. ²⁰Sanì un sin huín so', nì unún' so' nga Yan'anj únj. Gataj 'ngo chruj yo'ój gunun tsínj gui'yaj chruj: "Nì un sin huin nì gui'yáj re' ðaj man'anj únj." Hué ðaj ga'mi 'ngo chruj, ruhuá re' ní'. Sé ðaj huin mánj. ²¹Nì ðaj rún' aran' ruhua tsínj 'yaj chruj, nì hué ðaj 'yaj sij. Nì hué gue luti sige' ðaj 'yaj sij 'ngo chruj sa' nìn' ruhua nga ango chruj niqui nej. ²²Nì a'man ruhua Yan'anj ni'ya ni ngüi 'yaj quij. Nì gui'yaj Yan'anj castigo ni sij. Nì nunj si niganj nìn' gahuin ni

ngüi daj castigo, sanĭ a'nin' acuan' ruhua Yan'anĭ ni'yaj-á' ni sij. Daj si huin ruhua Yan'anĭ sisi guĭni'i daran' ni ngüi daj nucuaj man'an Yan'anĭ. ²³Nĭ huin ruhua Yan'anĭ digyanĭ rian ni ngüi daj gahuin 'ueé sa' né', guĭ'yaj Yan'anĭ. Nĭ asij sini nĭ nagui'yaj sa' Yan'anĭ né' sisi gane nĭganĭ né' rian hua sa' nne man'an Yan'anĭ. ²⁴Nĭ gaquínĭ Yan'anĭ ga'na' gane né' ngā Yan'anĭ. Nĭ da'aj né' huin ni ngüi israelita. Nĭ ango da'aj né' huin ni ngüi 'na' anéj chrej.

²⁵Nĭ hué daj gataj Yan'anĭ garun xĭ' Oseas asij ná:

Nĭ hua ni ngüi nun guĭnico' sini man'ānj.

Sani gahuin ni sij ni ngüi nico' man'ānj.

Nĭ asij sini nĭ nun gahuin ĩ' ruhuāj ni'yā ni ngüi daj.

Sani gahuin ĩ' ruhuāj ni'yā ni sij aj.

²⁶Nĭ rĭan gatā gunun ni sij sisi sé ni ngüi nico' man'ānj huin ni sij, nĭ hué yu'uj daj gahuin da'nĭ ni sij huin man'ānj Yan'anĭ hua ni'na'.

Daj gataj Yan'anĭ rian tsĭnj gu'naj Oseas.

²⁷Nĭ ga'mi nucuaj Isaías xi'f ni ngüi israelita. Nĭ gataj sí' asij ná:

Nĭ nunĭ si gahuin nico ni ngüi israelita daj rún' mán nico yo'ój chru mán du'ua nnee yan'anĭ, sanĭ doj ni sij ganacaj Yan'anĭ anĭ.

²⁸Daj si 'ngo hora ga'na' castigo nĭn' gachra' xungüi, guĭ'yaj Yan'anĭ. Daj gataj tsĭnj gu'naj Isaías.

²⁹Nĭ hué daj gataj Isaías nej:

Nĭ nucuaj nĭn' ruhua man'an Yan'anĭ.

Nĭ sisi gahui' daran' né' xi'f gaquin' da'ui né', nĭ hua gahuin xánĭ né' daj rún' hua xuman' Sodoma ngā xuman' Gomorra.

Sani nacaj Yan'anĭ doj né'.

Daj gataj Isaías asij ná.

La justicia que es por fe

³⁰Ngaa nĭ nunĭ huin si ruhuaj gata nuguan' nan, ruhua á re' únĭ. Huin ruhuaj gata sisi hua nĭca niman ni ngüi 'na' anéj chrej rian Yan'anĭ xi'f si xuman ruhua ni sij ni'yaj ni sij Yan'anĭ. Nĭ nun nano' ni sij sisi hué daj guĭ'yaj Yan'anĭ ngā ni sij. ³¹Sani guĭ'yaj fuerza ni ngüi israelita sisi dagahuin ni sij daj rún' ataj si-ley Yan'anĭ güenda sisi nahuin sa' niman ni sij rian Yan'anĭ. Sani nun ga'tue dagahuin ni sij si ataj ley da mánĭ. ³²Ngaa nĭ un sin huin nĭ nun gahuin sa' niman ni sij, ruhua á re' únĭ. Daj si nun ga'tuej ruhua ni sij guxuman ruhua ni sij ni'yaj ni sij Jesucristo. Maan si gani ruhua ni sij ngā xi'f si guĭ'yaj sa' man'an ni sij, nĭ a hua nĭca niman ni sij, ruhua ni sij. Hué dan nĭ natúj ni sij guĭ'yaj yej garij ni sij dacój ni sij daj. Nĭ yej daj huin Jesucristo.

³³Nĭ hué daj ga'mi nĭca si-nuguan' Yan'anĭ asij ná:

Hué xuman' Sión, nĭ gurū yej guĭ'yaj natu ni ngüi.

Nĭ ni ngüi guxuman ruhua ni'yaj Jesucristo, nĭ si gahuin na'aj ni sij mánĭ.

Sani gahui sa' ni sij, guĭ'yaj Yan'anĭ.

Nĭ yej daj huin Jesucristo.

Hué daj gataj Yan'anĭ.

10 Ducu huin ruhuāj sisi nacaj Yan'anĭ ni ngüi israelita

huin ín re' jnān nga xica'uí. Ní hué daj achínj jni'yā rian Yan'anj nej.

²Ga'ue gatā sisi 'yaj fuerza ni sij sisi dagahuin ni sij rian Yan'anj.

Sani nunun ni sij daj gui'yaj ni sij, ní ga'ue gahuin sa' ni sij rian Yan'anj.

³Ní nun ni'i ni sij sisi urin Yan'anj 'yaj sisi hua nica niman ni ngüi rian Yan'anj.

Ní nano' ni sij sisi ga nica niman ni sij rian Yan'anj xi'í si

gui'yaj man'an ni sij. Ní nun ga'uej ruhua ni sij daj rún' gataj Yan'anj

si gui'yaj ni sij. ⁴Daj si man'an Cristo gui'yaj sisi guisíj dagahuin

né' si ataj si-ley Yan'anj. Daj si Cristo gui'yaj sisi hua nica niman

né' xi'í si xuman ruhua né' ni'yaj né' man'an sij.

⁵Ní garun Moisés sisi daj ga nica niman ni ngüi xi'í si dagahuin ni sij

ley daj. Ní gataj sí': "Sisi dagahuin ni ngüi ni nuguan' daj, ní ga ni'na'

xanga' ni sij, gui'yaj ni nuguan' daj." Daj garun Moisés. ⁶Sani Cristo

'yaj sisi hua nica niman né' rian Yan'anj xi'í si xuman ruhua né'

ni'yaj né' man'an sij. Hué dan ní si gani ruhua né': "Un tsínj ga'ue

gahui xata'" —daj si nitaj si huaj si gan'anj xacaj né' Cristo ga'na'

ruhua' yún sí' ne' nica'. ⁷Ní si gani ruhua né': "Un tsínj ga'ue guinij

gan'anj riqui yo'ój'" —daj si nitaj si huaj si gan'anj xacaj né' Cristo

gan'anij ruhua' yún sí' scanij ni niman.

⁸Ní a'mi né' nuguan' sa' rian ni dugüi' né'. Daj si: "Gahuin nichrun'

nuguan' sa' nan nun du'ua né' nga niman né'." Ní hué nuguan' sa' nan

huin si nata' ni únj sisi guxuman ruhua né' ni'yaj né' Jesucristo. ⁹Ní

sisi nata' re' rian ni dugüi' re' sisi

Jesús huin Señor nicaj sun rian né', ní sisi guxuman xanga' ruhua

re' sisi ganá'nij Jesús scanij ni niman, gui'yaj Yan'anj, hué dan ní

nacaj Yan'anj man'án re'. ¹⁰Daj si sisi guxuman ruhua né' ni'yaj né'

Jesucristo, ní gahuin sa' né' rian Yan'anj. Ní sisi nata' du'ua né' sisi

nico' né' Jesús, ní nacaj Yan'anj né' nej aj.

¹¹Ní gataj Yan'anj: "Daran' ni tsínj xuman ruhua ni'yaj Yan'anj,

ní si gahuin na'aj ni sij. Sani gahui sa' ni sij." Hué daj gataj si-nuguan'

Yan'anj. ¹²Ní uyan huin ni ngüi israelita nga ni ngüi griego rian

Jesucristo. Daj si urin Señor Jesucristo nicaj sun rian daran'

né'. Ní nin' ruhua riqui Jesucristo nuguan' sa' rian daran' ni ngüi

achínj jni'yaj rian sij. ¹³Daj si hué daj gataj si-nuguan' Yan'anj:

"Daran' ni ngüi achínj jni'yaj rian Yan'anj nga si-xugüi Señor, ní nacaj Yan'anj

ni sij." Daj gataj si-nuguan' Yan'anj.

¹⁴Sani ngaa hua nin' achin guxuman ruhua ni sij ni'yaj ni sij

Señor, ní na'ue gachinj jni'yaj ni sij rian Señor mánj. Ní si ga'ue

guxuman ruhua ni sij ni'yaj ni sij sí' ngaa nin' achin gunun ni sij xi'í

sí'. Ní si ga'ue gunun ni sij ngaa nitaj tsínj nata' nuguan' sa' rian ni

sij mánj. ¹⁵Ní si ga'ue nata' 'ngo ni tsínj daj nuguan' sa' rian ni ngüi

sisi nitaj 'ngo tsínj ga'nij gan'anj nata' ni sij rian ni ngüi. Ní gataj

si-nuguan' Yan'anj: "Ní 'ueé nin' ruhua 'yaj ni tsínj gan'anj ga'mi

nuguan' sa' rian ni ngüi." Hué daj gataj si-nuguan' Yan'anj.

¹⁶Sani sé daran' ni ngüi ráj xina nga nuguan' sa' 'na' rian Yan'anj da

mánj. Ní hué daj ga'mi tsínj gu'naj Isaías ngaa nachínj snan'anj sij rian Yan'anj. Ní gataj sij: “Señor, un sin huin ní doj ni ngüi guxuman ruhua nuguan' nata' ni únj únj.” Daj gataj Isaías gunun Yan'anj.

¹⁷Hué dan ní ngaa guisíj gunun ni ngüi nuguan' sa', ní ga'ue guxuman ruhua ni sij ní'yaj ni sij Cristo. Ní ga'ue gara da'nga' ruhua ni sij ngaa a'mi 'ngo tsínj daj si-nuguan' Yan'anj rian ni sij.

¹⁸Saní sé si xanga' si nun gunun ni sij nuguan' sa' daj. Daj si gataj si-nuguan' Yan'anj:

Hua gaxa'ni nuguan' sa' nin' gachra' chruhua xungüi.

Ní da' ganun nin' xi'í xungüi guisíj nuguan' sa' daj.

Daj gataj si-nuguan' Yan'anj.

¹⁹Saní sé si xanga' si nun acaj ni ngüi israelita cuenta xi'í sa' daj. Daj si gataj Moisés asij hua ná:

Ní guí'yā sisi gahuin xicoj ruhua ni é re' ní'yaj ni é re' ni ngüi 'na' anéj chrej.

Ní guí'yā sisi ga'man ruhua ni é re' guini'yaj ni é re' ni ngüi nitaj ducúanj nicaj ga'mi.

Daj gataj Yan'anj garun Moisés rian ni ngüi israelita.

²⁰Ní hué daj guisíj ruhua Isaías gataj sí' nej:

Ni ngüi nun nano' yünj, ní hua nari' ni sij man'anj.

Ní digyán man'anj rian ni ngüi nun nāchin' snan'anj si-xugüij.

Daj gataj Yan'anj garun Isaías.

²¹Saní ngaa ga'mi Isaías xi'í ni ngüi israelita, ní gataj sí': “Nugüi nigan', ní dugüi'inj ra'áj sisi ga'na' ni sij riānj huin ni sij ni tsínj nun dagahuin riānj. Ní unun' ni sij nga

man'anj nej.” Daj gataj Yan'anj garun Isaías.

El remanente de Israel

11 Hué dan ní xanga' si danicaj Yan'anj ni ngüi israelita ní'. Sé daj huin mánj. Daj si hué man'anj huin 'ngo tsínj israelita nej. Ní yünj huin da'ni si'ni Abraham. Ní nicōj xi'nin' huin Benjamín. ²Sé si danicaj Yan'anj ni ngüi israelita mánj. Ní asij sini yan ngaa achin ga'nga ni ngüi israelita, ní hua guini'i Yan'anj ni sij.

Ní hua ni'i ni é re' daj ataj si-nuguan' Yan'anj xi'í tsínj gu'naj Elías asij ná. Ní ngaa gachínj jni'yaj sí' rian Yan'anj, ní ga'mi gaquin' sij xi'í ni ngüi israelita. Ní gataj sí':

³Señor, dagahui' ni sij ni tsínj ga'mi si-nuguan' man'án re'.

Ní duguane ni sij ni altar huin si-nná re' nej.

Ní ango rin man'anj gunā hua ní'na' nánj.

Ní hué daj huin ruhua ni sij dagahui' ni sij man'anj nej.

Daj gataj Elías gunun Yan'anj.

⁴Saní gataj Yan'anj gunun Elías: “Ní hua ri ninij ichij mí ni ngüi israelita na'uej gane ráj dācoj rian yan'anj gu'naj Baal.” Daj gataj Yan'anj gunun Elías.

⁵Ní hué ducúanj daj huin nga ni ngüi israelita güi yyaj. Daj si guí'yaj Yan'anj sinduj rian ni sij. Ní nacui Yan'anj doj ni sij. ⁶Nacui Yan'anj ni sij xi'í si 'ya sinduj nga ni sij. Ní sé xi'í si 'yaj sa' ni sij, ní nacui Yan'anj ni sij mánj. Ní sisi hué daj huin, ní sinduj 'yaj Yan'anj nga ni sij, ní sé 'ngo sinduj huin ga' mánj.

⁷Hué dan ní huin ruhua ni ngüi israelita gahui sa' niman ni sij

rian Yan'anj. Sanĭ nun guiri' ni sij si gahuin ruhua ni sij. Sanĭ ni ngüi ganacui Yan'anj, ni hué né' guiri' aj. Ni na'uej ruhua ango ni sij gunun ni sij, gui'yaj Yan'anj. ⁸Ni hué daj gataj si-nuguan' Yan'anj nej:

Ni gui'yaj Yan'anj sisi na'ue gara da'nga' ruhua ni sij nuguan' sa'.

Ni hué daj huin da güi acuan' nej.

Daj si nun rian ni sij, sanĭ na'ue xiguin ni'yaj ni sij.

Ni nun chraquij ni sij, sanĭ na'ue gunun ni sij mánj.

Daj gataj Yan'anj xi'f ni ngüi israelita. ⁹Ni hué daj gataj David asij ná nej:

Huin ruhuāj sisi gui'yanj 'yaj ni ngüi daj ganahuin-ín' xi' nga nnánj.

Ni guĭran' ni sij sayun daj rún' ran' xucu ata' ra'nga'.

Ni ganatuj ni sij gahuin ni sij castigo xi'f gaquin' gui'yaj ni sij.

¹⁰Ni huin ruhuāj sisi gahuin duri rian ni sij.

Ni si guixiguin guini'yaj ni sij mánj.

Ni gache nitu ni sij niganj nin', ruhuāj aj.

Daj gataj David.

La salvación de los gentiles

¹¹Hué dan ni atā gunun ni é re' sisi sé si guere' niganj ni ngüi israelita rian Yan'anj mánj. Daj si ngaa nun dagahuin ni sij, ni nacaj Yan'anj ni ngüi 'na' anéj chrej. Xi'f daj ni gahuin xicoj ruhua ni sij ni'yaj ni sij ni ngüi 'na' anéj chrej daj. ¹²Ni rian guere' ni ngüi israelita rian Yan'anj,

ni hua sa' rian ni ngüi man chruhua xungüi. Ni ganacaj Yan'anj ni ngüi 'na' anéj chrej xi'f si guere' ni sij nej. Ni sisi hué daj huin, ni sa' nin' gahuin ngaa guinico' ruhua' yún ni ngüi israelita Yan'anj.

¹³Yyaj ni ga'mi rian ni é re' huin ni é re' ni ngüi 'na' anéj chrej. Ni ga'nij Jesucristo gan'an rian án re' huinj apóstol a'mi si-nuguan' sí. Ni xi'f daj ni 'yaj fuerzāj nga si-sünj.

¹⁴Daj si huin ruhuāj sisi gahuin xicoj ruhua ni ngüi israelita guini'i ni sij ni é re'. Ngaa ni ga'ue nacaj Yan'anj da'aj ni sij. ¹⁵Ngaa danicaj Yan'anj ni ngüi israelita, ni gahuin nuguan'an ni ngüi mán nin' gachra' chruhua xungüi nga Yan'anj. Ngaa ni gahuin sa' nin' ni ngüi israelita ngaa guinica' dugüi' ruhua' yún Yan'anj nga ni sij. Daj si daj rún' huin ni tsfnj gahui' huin ni sij yyaj. Sanĭ gana'nij ni sij, gui'yaj Yan'anj. ¹⁶Sisi hua sa' doj quinj, ni daran' quinj daj hua sa'. Ni sisi hua sa' ya'a siu chrun daj, ni hua sa' 'ngo gue chrun nga ra'a nej.

¹⁷Ni daj rún' 'yaj né' ngaa a'nin' né' ra'a chrun, ni hué daj gui'yaj Yan'anj nga ni ngüi israelita. Ni hué ni é re' huin rún' huin 'ngo ra'a chrun 'na' riqui quij. Ni na'nij Yan'anj scanij chrun sa' olivo ni é re' yu'uj guimán ni ngüi israelita. Ngaa ni ga ni'na' ni é re' gui'yaj ya'a siu chrun olivo daj. Ni rún' huin ra'a chrun olivo sa' huin ni ngüi xuman ruhua ni'yaj Yan'anj. ¹⁸Xi'f daj ni si gani ruhua ni é re' sisi sa' huin ni é re' daj nga ni ngüi israelita. Ni sisi hué daj ani ruhua ni é re', ngaa ni nanun sa' ruhua ni é re' sisi hua ni'na' ni é re', gui'yaj ya'a siu chrun.

Ni sé ni é re' gui'yaj sisi hua ni'na' ya'a siu chrun mánj. ¹⁹Ni si ruhuaj, ni gataj ni é re': "Ga'nin' Yan'anj ni ra'a chrun daj xi'í si na'nij-i' ni é re' scanij chrun sa' olivo daj." ²⁰Hué daj huin xanga'. Sani rian nun guxuman ruhua ni ngüi israelita, ni guere' ni sij rian Yan'anj. Ni 'nij ni é re' scanij chrun daj urin si xuman ruhua á re' ni'yaj á re' Yan'anj. Ngaa ni si ga nne é re' si 'nij ni é re' scanij chrun daj. Maan si ga cuidado ni é re' nga chrej huaj á re' nánj.

²¹Ni sisi nun guñicaj Yan'anj 'ngo niman nico xi'í si-gaquin' ni ngüi israelita huin ni sij ra'a chrun daj, ngaa ni si guñicaj Yan'anj 'ngo niman nico xi'í ni é re' nej. ²²Ni'yaj ni é re' yyaj. Huin sa' ruhua Yan'anj ni'ya ni ngüi. Sani sun du'ua Yan'anj rian ni ngüi nej. Ni gahuin castigo ni ngüi israelita, gui'yaj Yan'anj. Sani gui'yaj sa' Yan'anj nga man'an ni é re'. Ni hué daj gui'yaj Yan'anj sinduj rian án re' sisi si gan'anj anéj ni é re' rian Yan'anj. Daj si sisi si dagahuin ín re' rian Yan'anj, ni hué daj ga'nin' Yan'anj ni é re' nej nánj. ²³Ni sisi ga'uej ruhua ni ngüi israelita guxuman ruhua ni sij ni'yaj ni sij Yan'anj, ngaa ni na'ninj ruhua' yún Yan'anj ni sij scanij chrun daj. Daj si si-fuerza man'an Yan'anj ga'ue gui'yaj sisi na'ninj ruhua' yún-ún' ni sij. ²⁴Ni sé ni é re' huin ni ngüi israelita mánj. Hué ni é re' huin 'ngo ra'a chrun 'na' riqui quij ga'nin' Yan'anj. Ni na'nínj Yan'anj ni é re' scanij chrun olivo sa' hua. Ni sisi ni ngüi israelita huin ra'a chrun olivo sa' hua daj, ngaa ni huaj doj ga'ue

gana'nij ruhua' yún Yan'anj ni sij scanij chrun olivo da aj.

La restauración de Israel

²⁵Ni huin ruhuaj sisi guñi'i ni é re' huin ni jnán nga ni xica'ui 'ngo nuguan' sa' garij huí Yan'anj. Ngaa ni guisíj gunun ni é re' nuguan' nan, ni si güin ga'mi xacan án re' mánj. Daj si da'aj ni ngüi israelita na'uej ruhua gunun si gataj Yan'anj rian ni sij. Ni hué daj ga ni ngüi israelita da guisíj güi guxuman ruhua daran' ni ngüi nacui Yan'anj huin ni sij ni ngüi 'na' anéj chrej. ²⁶Ni ngaa hué daj gahuin, ni ganacaj Yan'anj daran' ni ngüi israelita. Ni hué daj gataj si-nuguan' Yan'anj nej:

Ne' xuman' Sión ga'na' 'ngo tsínj ganacaj ni ngüi.

Ni ga'ne sij si-gaquin' ni dugüi' Jacob huin ni sij ni ngüi israelita.

²⁷Ni nan huin nuguan' gui'yaj yyāj nga ni sij güi ga'nē si-gaquin' ni sij.

Daj gataj si-nuguan' Yan'anj.

²⁸Ni unun' ni ngüi israelita nga Yan'anj xi'í si na'ue guxuman ruhua ni sij nga nuguan' sa' 'na' rian Yan'anj. Ni xi'í si hué daj 'yaj ni sij, ni hua ni'nij gatú ni é re' si-chrej Yan'anj. Sani hua gue 'i ruhua Yan'anj ni'yaj-á' ni sij xi'í si hua ganacui Yan'anj ni xi ni sij asij hua ná. ²⁹Ni nitaj aman naduna Yan'anj si-nuguan'anj. Ni si ga'ue ga'ne ruhua' yún Yan'anj nuguan' riquij riún'. Ni sisi gaquínj Yan'anj né', ni si nanicaj ruhua-á' nga nuguan' da ga mánj.

³⁰Ni güi gachin, ni nun dagahuin ni é re' rian Yan'anj huin ni é re'

tsínj 'na' anéj chrej. Ní xí'f si nun dagahuin ni ngüi israelita, nî nani yaco ruhua Yan'anj ni'ya ni é re' yyaj.

³¹Nî nun dagahuin ni ngüi israelita rian Yan'anj. Hué dan nî xí'f si nani yaco ruhua Yan'anj ni'ya ni é re', nî ga'ue nani yaco ruhua Yan'anj ni'ya ni ngüi israelita nej. ³²Nî xí'f si uyan gui'yaj ni ngüi israelita nga ni ngüi 'na' anéj chrej gaquin', nî gataj Yan'anj sisi uyan da'ui daran' ni sij gaquin'. Xí'f daj nî ga'ue nani yaco ruhua Yan'anj ni'ya daran' ni sij.

³³Yan'anj nî'n' ruhua huin si sa' xí'f né'. Chrun nî'n' ruhua Yan'anj, nî ni'i-ín' daran' nuguan' nej. Na'ue gara da'nga' ruhua né' daj ani ruhua Yan'anj. Nî si guisíj né' guñi'i né' daj hua si-chrej Yan'anj nej. ³⁴Nî si guisíj né' guñi'i né' nuguan' sa' ahui chra Señor. Nî si guisíj né' ga'ui' né' 'ngo chrej rian Yan'anj anj. ³⁵Nî nitaj a 'ngo tsínj ga'ue ga'ui' xiquínj 'ngo rasun rian Yan'anj, ngaa nî naru'ue Yan'anj rian sij mánj. ³⁶Daj si Yan'anj gui'yaj daran' ni rasun má'n. Nî daran' ni rasun huin güenda man'an Yan'anj. Nî nānicaj daran' ni rasun rian Yan'anj nej. Xí'f daj nî ga'mi sa' 'ueé niganj nî'n' né' rian Yan'anj. Amén.

Deberes cristianos

12 Nî xí'f si nani yaco ruhua Yan'anj ni'ya né', nî gataj snan'ān rian án re' sisi naga'ui' ni é re' man'an ni é re' rian Yan'anj. Nî daj rún' hua nî'na' ni xucu ga'ui' ni ngüi rian Yan'anj asij ná, nî hué daj naga'ui' ni é re' man'an án re'

sisi dagahuin ni é re' rian Yan'anj nej. Nî ga'huin nîni ni é re' rian ni gaquin'. Nî hué daj ga'ue gui'yaj ni é re' daj rún' aran' ruhua Yan'anj. Nî ni'f' sisi hué daj hua nian gui'yó'. ²Nî si gui'yaj á re' daj rún' 'yaj ni ngüi man chruhua xungüi gaquin' nan mánj. Sanî ga'uej ruhua á re' ga'huin sa' niman án re', gui'yaj Yan'anj anj. Ngaa nî ga'ue ga'huin chrun sa' ni é re' guñi'i ni é re' nuguan' sa' huin ruhua Yan'anj gui'yaj á re'. Nî aran' ruhua Yan'anj ni'ya nuguan' daj. Nî hua nica nuguan' daj nej.

³Nî rian riqui Yan'anj sinduj riānj, nî 'yaj fuerzāj rian daran' ni é re' sisi si gani ruhua ni é re' si huin achij ni é re' mánj. Sanî gani ruhua ni é re' xí'f man'an ni é re' daj rún' huin yya ni é re' sisi daj riqui Yan'anj si xuman ruhua go'ngo ni é re'.

⁴Nî ni'i né' sisi urin nnee cúj né' hua. Sanî naduna hua go'ngo yu'uj nî'n' gachra' nnee cú'. Nî nîni sun 'yaj sun go'ngo yu'uj daj. ⁵Nî hué daj huin né' huin né' ni ngüi nicaj dugüi' nga Cristo. Nî nunj si ga'i nî'n' ruhua né' huin, sanî urin nnee cúj Cristo huin né'. Nî uyan nicaj dugüi' né' nga ni dugüi' né' daj rún' hua nnee cúj né' aj. Nî chracuij né' go'ngo ni dugüi' né'. ⁶Nî nîni riqui Yan'anj sun rian go'ngo né'. Ngaa nî gui'yaj sun go'ngo né' sun riqui Yan'anj rian go'ngo né'. Nî sisi ga'nin' Yan'anj sun ga'mi 'ngo né' si-nuguan'-án' rian ni dugüi' né', hué dan nî ga'mi né' nuguan' daj daj rún' xuman ruhua né' aj. ⁷Nî sisi hué daj ga'nin' Yan'anj sun rian ango né' güenda chracui' ni dugüi', nî hué daj gui'yó' rian ni dugüi'. Nî

sisi ga'nin' Yan'anj sun rian ango né' güenda digyún' rian ni dugüi' né', ni da'ui' si digyún' rian ni dugüi'.

⁸Ni sisi hua sun rian ango ni dugüi' güenda ga'ui' sij chrej rian dugüi' sij, ni da'ui' sij ga'ui' sij chrej rian dugüi' sij. Ni sisi hua sun rian ango ni dugüi' né' güenda ga'ui' sij rasun rian ni ngüi' niqui, ngaa ni gahuin nia' ruhua sij, gui'yaj sij daj. Ni sisi hua ango né' nicaj sun rian ni dugüi' né', ni gui'yaj sa' sij nga si-sun sij. Ni sisi hua sun rian ango né' chracuij sij ni dugüi' né', ni gahuin nia' ruhua sij nga si 'yaj sij daj.

⁹Si gataj á re' sisi 'i ruhua á re' ni'yaj á re' ni dugüi' a ni é re' sisi sé daj huin xanga'. Ni si ga'uej ruhua á re' si gui'yaj á re' si xi'i. Sani gui'yaj sa' ni é re' aj. ¹⁰Ni gahuin 'i ruhua á re' ni'yaj á re' ni dugüi' ni é re' huin ni sij ni tsínj nico' Jesús. Ni gara xina ni é re' sisi gahuin rian ni dugüi' ni é re' daj nga man'an án re'. ¹¹Ni gui'yaj fuerza ni é re' nga niman ni é re'. Ni si guinichre ni é re' nga si-sun Señor mánj. ¹²Ni gahuin nia' ruhua ni é re' xi'í si ana'uij ni é re' si gui'yaj sa' Yan'anj nga ni é re'. Ni ga'nin' ruhua ni é re' ngaa ran' ni é re' sayun. Ni si duna ni é re' gachinj jni'yaj ni é re' rian Yan'anj mánj. ¹³Chracuij ni é re' ngaa achin 'ngo rasun rian ni ngüi' xuman ruhua ni'yaj Yan'anj. Ni gana'ni ni é re' rian ducua' ni é re' gatu ni ngüi' 'na' chrej.

¹⁴Gachinj jni'yaj ni é re' rian Yan'anj sisi gui'yaj sa' Yan'anj nga ni ngüi' chran' yun'unj ni é re'. Ni si ga'mi quij ni é re' rian ni sij mánj.

¹⁵Gahuin nia' ruhua ni é re' nga ni ngüi' hua nia' ruhua. Ni gaco ni é

re' nga ni ngüi' aco nej. ¹⁶Ni uyan ga ruhua daran' ni é re'. Ni si gui'yaj á re' si gahuin achij ni é re' rian ni dugüi' ni é re' mánj. Maan si guinicaj dugüi' ni é re' nga ni ngüi' niqui. Ni si gahuin ruhua ni é re' sisi chrun ni é re' mánj.

¹⁷Si gui'yaj quij ni é re' nga ni ngüi' 'yaj quij nga ni é re' mánj. Sani dugu'nun' ni é re' gui'yaj sa' ni é re' rian daran' ni ngüi'. ¹⁸Ni sisi ga'uej ruhua ni ngüi, ni guiman din'inj ni é re' nga daran' ni sij. ¹⁹Huin 'i ruhuaj ni'yā ni é re'. Ni si gui'yaj á re' daj rún' 'yaj ni ngüi' chran' yun'unj ni é re' mánj. Sani ga'nin' ruhua ni é re' sisi Yan'anj gui'yaj castigo ni sij. Daj si gataj si-nuguan' Yan'anj: "Man'anj huin si gui'yaj castigo ni sij. Man'anj naru'ue xi'í si quij gui'yaj ni sij." Daj gataj Señor. ²⁰Hué dan ni sisi achin xi'na riqui ni ngüi' unun' nga ni é re', ngaa ni ga'ui' ni é re' xa ni sij. Ni sisi nago'oj ni sij nnee, ni ga'ui' ni é re' go'o ni sij. Ni sisi hué daj gui'yaj sa' ni é re' nga ni sij, ni gahuin na'aj ni sij nga xi'í quij gui'yaj ni sij. ²¹Si duna ni é re' sisi gui'yaj gana nuguan' quij hua rian ni é re' mánj. Sani gui'yaj gana ni é re' nga nuguan' sa' rian ni nuguan' quij hua.

13 Dagahuin daran' ni é re' rian ni tsínj nicaj sun huin gobierno chruhua xungüi' nan. Daj si daran' ni sun 'na' rian Yan'anj. Ni Yan'anj gui'yaj sisi guinicaj ni sij sun chruhua xungüi' nan. ²Ngaa ni ni ngüi' unun' nga tsínj nicaj sun, ni unun' ni sij nga nuguan' a'nin' Yan'anj sun rian né'. Ni ni ngüi' unun' daj, ni gahuin castigo ni

sij, guí'yaj Yan'anj. ³Daj si nitaj si xí'i huin sisi guxu'ui' ni ngüi 'yaj sa' rian ni tsínj nicaj sun. Saní ni ngüi 'yaj quij, ní hua 'ngo si xí'i guxu'ui' ni sij ní'i ni sij ni tsínj nicaj sun. Guí'yaj sa' re', ngaa ní sí guxu'uí' re' rian ni tsínj nicaj sun mánj. Hué dan ní xacaj cuenta ni tsínj nicaj sun si 'yaj sa' re'. Ní ga'mi sa' ni sij xí'f re'. ⁴Hué ni sij nicaj sun xí'f Yan'anj. Ní nne ni sij güenda sisi chracuuj ni sij man'án re'. Saní sisi guí'yáj re' gaquin', ní guxu'ui' re' rian ni sij. Daj si nitaj si ata chre ni sij chrun ní'f mánj. Ní 'nj nicaj sun ni sij sisi ga'ue guí'yaj ni sij castigo ni ngüi 'yaj quij hua. ⁵Xí'f daj ní hua nian dagahuin né' rian ni tsínj nicaj sun. Ní sé xí'f urin si guí'yaj ni sij castigo né', saní dagahuin né' xí'f si hué daj a'nin' nimún' rian man'an né'. ⁶Ní hué xí'f daj a'ui' ni é re' san'anj rian ni tsínj nicaj sun. Daj si nicaj sun ni sij xí'f Yan'anj. Ní ya'voj dagahuin ni sij nga si-sun ni sij. ⁷Hué dan ní daran' si da'ui né', ní ga'ui' né'. Sisi da'ui né' rian ni tsínj nicaj sun, ní naga'ui' né' si da'ui né'. Ní guru'ue né' rian ni tsínj a'nej san'anj. Ní ga ní'yanj né' nga ni tsínj huin achij. Ní guinun yan'anj né' ni tsínj huin rian nej.

⁸Sí da'ui ni é re' xiquúnj rian ni ngüi mánj. Maan si da'ui ni é re' si gahuin 'i ruhua á re' ní'yaj ni é re' ni dugüi' ni é re'. Daj si né' 'i ruhua ni'yaj dugüi', ní hua dagahuin né' si a'nin' si-ley Yan'anj rian né'. ⁹Ní hua a'nin' si-ley Yan'anj sun rian né'. Ní gataj ley daj: “Sí ga'mi né' nga nica dugüi' né'. Ní sí dagahui' né' ni ngüi mánj. Ní sí guí'yaj tu né' nga si'yaj ni dugüi' né' mánj. Ní sí ga'mi

snan'anj né' xí'f ni dugüi' né' mánj. Ní sí gahuin ruhua né' nga si'yaj ni dugüi' né' mánj.” Daj hua si-ley Yan'anj. Ní gataj ango si-ley Yan'anj: “Ga'i ruhua né' ni'yaj né' ni dugüi' né' daj rún' 'i ruhua né' ni'yaj né' ni man'an né'.” Daj hua ley daj. Ní sisi dagahuin né' ley nan ní dagahuin né' daran' ango ley a'nin' Yan'anj sun rian né'. ¹⁰Ní sisi 'i ruhua né' ni'yaj né' ni dugüi' né', ní nitaj si guí'yaj quij né' nga ni dugüi' né' ga mánj. Hué dan ní sisi 'i ruhua né' ni'yaj né' ni dugüi' né', ngaa ní dagahuin xanga' né' si gataj si-ley Yan'anj rian né'.

¹¹Ní hué nan huin si guí'yaj né' xí'f si ní'i né' daj hua chruhua xungüi mán né'. Ní síj hora si nari né' nnej rian né'. Daj si ngaa guxuman sini ruhua né' ni'yaj né' Jesucristo, ní gahuin nichrun' ga'na' Yan'anj naca né', ruhua né'. Saní yyaj ní gahuin nichrun' doj si ga'na' Yan'anj naca né'. ¹²Ní daj rún' hua rumi' xungüi ngaa hua rumi', ní da'nga' daj hua ni ngüi man chruhua xungüi. Saní gahuin nichrun' güi ga'na' Jesucristo, ngaa ní guixiguin rian né'. Ngaa ní sí guí'yaj né' daj rún' 'yaj ni ngüi man rian rumi' ga mánj. Ní guí'yaj né' daj rún' 'yaj ni ngüi man rian xiguin hua. ¹³Gache sa' né' daj rún' hua ngaa achéj né' ngaa xiguin ne' guní'yanj. Ní sí xa nasa' né' mánj. Ní sí guixini né' gache né' mánj. Ní sí guí'yaj né' guí'yanj ngaa aguáj ni ngüi mánj. Ní sí guí'yaj squira' né' mánj. Ní sí gunun' né' nga ni dugüi' né' mánj. Ní sí gahuin xicoj ruhua né' nga ni dugüi' né' mánj. ¹⁴Saní guí'yaj né' daj rún' huin ruhua

Jesucristo si gui'yaj né'. Ní sí ga'nij né' chrej gui'yaj né' daj rún' huin ruhua nnee cúj né' mánj.

Los débiles en la fe

14 Guinicaj dugüi' né' nga ni ngüi achin guxuman sa' ruhua ni'i Jesucristo. Ní sí gunun' né' nga ni sij mánj. ²Gui'yo' cuenta sisi ani ruhua 'ngo tsínj daj sisi ga'ue xa sij daran'anj. Sani hua ango tsínj achin guxuman sa' ruhua, sani urin cuej xa sí'. ³Nгаа ni sí gataj tsínj xa daran'anj sisi tsínj nun ni'i huin ango tsínj da mánj. Ní tsínj na'ue xa daran'anj, ní sí ga'ue gataj sij sisi gaquin' huin ngaa xa ango tsínj daran'anj. Daj si hua nahuin ra'a Yan'anj tsínj daj. ⁴Ní un sin ní diguíj re' nga 'ngo tsínj unánj guitsi rian Señor únj. Man'an Señor gataj sisi 'yaj sa' sij sisi nun 'yaj sa' sij. Ní gunucuaaj sij gui'yaj gana sij si Señor huin si nicaj fuerza daj gui'yaj gana sij.

⁵Ní hua 'ngo tsínj ataj: Hua 'ngo güi gue rian sij. Ní hua ango tsínj ataj: Uyan huin daran' ni güi rian sij. Hua nian si ga xitinj ruhua go'ngo né' nga si ani ruhua né'.

⁶Tsínj ataj sisi gue 'ngo güi daj, ní hué daj ataj sij xi'f Señor. Ní tsínj ataj sisi uyan huin daran' ni güi, ní hué daj ataj sij xi'f Señor nej. Ní tsínj xa daran'anj daj, ní hué daj 'yaj sij xi'f Señor. Ní a'ui' sij si guruhua Yan'anj. Ní tsínj na'ue xa daran'anj, ní hué daj 'yaj sij xi'f Señor. Ní a'ui' sij si guruhua Yan'anj nej. ⁷Sé si man né' güenda man'an né' mánj. Ní sé si gahui' né' nga güenda man'an né' mánj.

⁸Sisi man né', sani man né' güenda

Señor. Ní sisi gahui' né', sani gahui' né' güenda Señor. Ngaa ní, asi man né', asi gahui' né', sani nicaj dugüi' né' nga Señor. ⁹Ní gahui' Cristo. Ní ganá'nij sij. Ní hué daj gui'yaj sij sisi gahuin sij Señor guinicaj sun sij rian ni ngüi gahui' nga ni ngüi hua ní'na' nej.

¹⁰Ngaa ní un sin huin ní atáj re' si 'yaj jnánj re' gaquin' únj. Ní un sin huin ní a'mí re' sisi tsínj nun ni'i huin dugüi' re' únj. Hua nian si gan'anj daran' né' ganiquin' né' rian Cristo sisi nagui'yaj yya sij si-gaquin' daran' né'. ¹¹Daj si gataj si-nuguan' Yan'anj:

Daj rún' hua yya hua ní'na' man'ánj, ní hué daj hua yya sisi ganiquin' ráj dacoj daran' ni ngüi riánj.

Ní ga'mi sa' 'ueé daran' ni sij rian Yan'anj.

Daj gataj Señor. ¹²Daj si 'na' güi ngaa naga'ui' da' go'ngo né' cuenta rian Yan'anj xi'f si gui'yaj né'.

¹³Xi'f daj ní sí ga'mi né' gaquin' rian ni dugüi' né' mánj. Sani ga cuidado né' sisi sí guere' 'ngo ni dugüi' né' nga si-chrej Yan'anj mánj. Daj si nitaj si hua sa' si duna sij si xuman ruhua sij ni'yaj sij Yan'anj. ¹⁴Ní xuman ruhuáj ni'yá Señor Jesús. Xi'f daj ní hua xitinj ruhuáj sisi nitaj a 'ngo rasun quij hua. Sani sisi 'ngo né' ani ruhua sisi quij hua 'ngo rasun, sani quij hua rasun daj güenda xa tsínj daj. ¹⁵Ní sisi rasun xá re' 'yaj sisi nani ruhua dugüi' re', ngaa ní nun hua sa' si xa re' rasun daj. Daj si sisi 'i ruhuá re' ni'yáj re' dugüi' re', ní sé daj gui'yáj re' mánj. Ní sí gui'yáj re' sisi duna dugüi' re' si-chrej Yan'anj xi'f rasun xá re'

mánj. Daj si gahui' Cristo xi'f dugüi' re' daj. ¹⁶Ni sisi ani ruhua re' si sa' 'yáj re', ni si duná re' si ga'mi quij ni ngüi xi'f si 'yáj re' mánj.

¹⁷Daj si ngaa nne né' rian nicaj Yan'anj sun, ni hua nica 'yaj né'. Ni hua din'inj ruhua né' nej. Ni hua nia' ruhua né', 'yaj Espíritu Santo nej. Ngaa ni si nani ruhua né' xi'f si xa né' nga xi'f si go'o né' mánj. ¹⁸Ni sisi hué chrej nan dagahuin sa' né' rian Cristo, ngaa ni garan' ruhua Yan'anj ni'yaj né'. Ni ga'mi sa' ni ngüi xi'f né' nej.

¹⁹Hué dan ni gui'yaj fuerza né' sisi hua din'inj scanij ni dugüi' né'. Ni chracuij né' sisi guxuman sa' ruhua go'ngo ni dugüi' né'. ²⁰Ni si gui'yáj re' sisi duna 'ngo dugüi' re' si-chrej Yan'anj xi'f 'ngo rasun xa re' mánj. Xanga' ni daran' ni rasun hua sa' xa né'. Sani sisi duna 'ngo dugüi' né' si-chrej Yan'anj xi'f si xa né', ni nitaj si hua sa' mánj. ²¹Ni sisi duna 'ngo ni dugüi' né' si-chrej Yan'anj xi'f si xa né' nnee nga xi'f si go'o né' vino nga xi'f ango ni rasun 'yaj né', hué dan ni nitaj si hua sa'aj si 'yaj né' ni nuguan' daj.

²²Ni gui'yáj re' sisi urin man'án re' nga Yan'anj guini'i daj ani ruhua re' xi'f ni nuguan' daj. Hua 'uee rian né' sisi ni'f si hua sa' chruhua né'. Ni nitaj si uta' gaquin' mun'un' nga si 'yaj né' mánj. ²³Ni sisi nun ni'i 'ngo né' sisi ga'uej Yan'anj xó' 'ngo rasun daj, ngaa ni da'ui né' gaquin' rian Yan'anj xi'f si xó' rasun daj. Ni nun hua sa' sisi xa né' 'ngo rasun ngaa nun ni'i né' sisi ga'uej Yan'anj xa né'. Daj si gaquin' huin daran' si 'yaj né' ngaa nun ni'i né' sisi ga'uej Yan'anj gui'yaj né'.

15 Sisi hua nica ruhua né' nga si-nuguan' Yan'anj, ni chracuij né' ni ngüi achin gahuin nica ruhua nga si-nuguan' Yan'anj. Ni si gui'yaj né' daj rún' ninanj aran' ruhua né', gui'yaj né' mánj. ²Ni daran' né' gui'yaj daj rún' aran' ruhua dugüi' né'. Ni gui'yaj sa' né' ni rasun güenda man'an ni sij. Hué ducuanj daj ga'ue gahuin nica ruhua ni sij nga si-chrej Yan'anj, gui'yaj né'. ³Daj si nun gui'yaj Cristo si garan' ruhua sij gui'yaj sij. Daj si gataj Cristo rian si-nuguan' Yan'anj: "Ni ga'mi ni ngüi nuguan' quij hua rián re' huín re' Yan'anj. Sani hué riánj huin si ga'mi quij ni sij nuguan' daj rún' huaj." Daj gataj Cristo gunun Yan'anj. ⁴Ni daran' ni nuguan' garun ni sij asij ná huin güenda si gahuin chrún né', garun ni sij. Ni xi'f ni nuguan' daj, ni gahuin nucuaj né' gui'yaj gana né' rian sayun. Ni ganari' nucuaj niman né', gui'yaj si-nuguan' Yan'anj. Hué daj ni gahuin yya ruhua né' si gui'yaj sa' Yan'anj nga né'. ⁵Ni Yan'anj 'yaj sisi huin nucuaj niman né'. Ni Yan'anj 'yaj si nari' nucuaj niman né' nej. Hué dan ni huin ruhuáj sisi uyan ga ruhua ni é re' gui'yaj Yan'anj si hué daj digyán Jesucristo rian né'. ⁶Ngaa ni 'ngo chré' ga ruhua daran' né' si ga'mi sa' né' rian Yan'anj huin chrej Jesucristo huin sí' Señor nicaj sun rian né'.

El evangelio a los gentiles

⁷Hué dan ni nahuin ra'a ni é re' ni dugüi' ni é re' daj rún' nahuin ra'a Cristo ni é re' aj. Ngaa ni guini'i ni ngüi si 'yaj sa' Yan'anj.

⁸Ni ataj snan'ān gūnun ni é re' si ga'na' Cristo gui'yaj sun sí' rian ni ngüi israelita. Ni hué daj gui'yaj sí' güenda dagahuin sí' nuguan' gui'yaj yya Yan'anj nga ni xi né' ni tsínj guimán asij ná. Ngaa ni gahuin yya daj rún' gataj Yan'anj rian ni sí', gui'yaj Cristo. ⁹Ni ga'na' Cristo sisi ga'mi sa' ni ngüi 'na' anéj chrej rian Yan'anj xi'í si nahuin yaco ruhua Yan'anj ni'yaj-á' ni sij. Ni hué daj gataj si-nuguan' Yan'anj xi'í Cristo:

Xi'í daj ni ga'mi sa' man'ānj scanij ni ngüi 'na' anéj chrej xi'í re'.

Ni si-xugüi re' garā chra'.

Daj gataj si-nuguan' Yan'anj xi'í Cristo. ¹⁰Ni gataj ango nuguan' daj nej:

Gahuin nia' ruhua ni é re' nga ni ngüi nico' Yan'anj huin ni é re' ni ngüi 'na' anéj chrej.

Daj gataj nuguan' daj.

¹¹Ni gataj ango nuguan' daj nej:

Ga'mi sa' ni é re' rian Señor huin ni é re' ni ngüi 'na' anéj chrej nga ni ngüi man nín' gachra' chruhua xungüi.

Daj gataj nuguan' daj.

¹²Ni gataj ruhua' yún Isaías:

Ga'nga 'ngo lij gahuin da'níj tsínj gu'naj Isái.

Ni gachij lij daj.

Ni guinicaj sun sij rian ni ngüi 'na' anéj chrej.

Ni gana'uuj ni sí' sisi nagui'yaj sa' sij si-chrej ni sí'.

Daj gataj Isaías.

¹³Ni Yan'anj riqui si ana'uuj né'. Ni huin ruhuāj sisi nín' ruhua gahuin nia' ruhua ni é re', gui'yaj Yan'anj anj. Ni gahuin din'inj ruhua ni é re' nej xi'í si xuman ruhua ni é

re' ni'yaj ni é re' Yan'anj. Ngaa ni gahuin yya ruhua á re' doj sisi gahui sa' á re', gui'yaj Espíritu Santo, ruhuāj aj.

¹⁴Ni hua yya ruhuāj sisi nun ruhua ni é re' ni nuguan' sa' gahuin chrún ni é re' huin ni é re' jnān nga xica'uī. Ni ni'inj sisi ga'ue ga'ui' go'ngo ni é re' chrej sa' rian dugüi' ni é re' nej. ¹⁵Ni yanj nan guisíj ruhuāj garünj go'ngo nuguan' rian án re'. Ni huin ruhuāj sisi ga nigui'ij ni é re' nga ni nuguan' nan. Daj si riqui Yan'anj sinduj riānj sisi guinicaj sūnj. ¹⁶Ni 'yaj sūnj rian Jesucristo xi'í ni ngüi 'na' anéj chrej. Ni daj rún' 'yaj sun 'ngo chrej rian Yan'anj, ni hué daj 'yaj sūnj a'mi man'ānj nuguan' sa' huin si-nuguan' Yan'anj rian án re'. Ni natāj nuguan' si daj ga'ue ganacaj Yan'anj ni ngüi 'na' anéj chrej. Ni hué daj 'yā xi'í si ga'ue naga'uuj ni ngüi 'na' anéj chrej rian Yan'anj. Ni huin ruhuāj sisi garan' ruhua Yan'anj nga ni ngüi naga'uuj daj. Ni gahuin sa' niman ni sij, gui'yaj Espíritu Santo. ¹⁷Ni xi'í si chracuij Cristo man'ānj, ni ga'ue ga'mi sa' man'ānj xi'í si-sūnj huin si-sun Yan'anj.

¹⁸Daj si guisíj ruhuāj ga'mi xi'í urin nuguan' gui'yaj Cristo ngāj. Ni hué nan huin sisi dagahuin ni é re' huin ni é re' ni ngüi 'na' anéj chrej si-nuguan' Yan'anj. Ni dagahuin ni é re' xi'í si natāj nuguan' sa' rian án re'. Ni dagahuin ni é re' xi'í sun gui'yaj sūnj scanij ni é re' nej. ¹⁹Ni gahuin nucuaaj si-nuguan'ānj, gui'yaj Yan'anj. Ni gui'yā si sa', gui'yaj Espíritu Santo nej. Ni hué daj hua natāj nuguan' sa' xi'í Cristo rian ni ngüi sisi ganacaj Yan'anj ni sij.

Ni gaxi'i natāj nuguan' daj xuman' Jerusalén da nin' gachra' ni xuman' ngaj da' estado Ilírico nej. ²⁰Ni ninanj gahuin ruhuāj natāj nuguan' sa' daj rian ni ngüi achin gunun si-nuguan' Cristo. Daj si na'uej ruhuāj natāj nuguan' daj rian hua gunun ni ngüi, gui'yaj ango tsínj. ²¹Ni hué daj gataj si-nuguan' Yan'anj nej:

Guini'i ni ngüi nun gahuin
gunun xi'í si-nuguan' Cristo.

Ni ngüi nitaj aman gunun, sani
gara da'nga' ruhua ni sij xi'í
si-nuguan' sij.

Daj gataj si-nuguan' Yan'anj.

Pablo se propone ir a Roma

²²Xi'í daj ni guisij ga'i na'ue
guchi' ni'yā rian man ni é re' mánj.

²³Ni yyaj guisij gui'yaj sūnj ni
xuman' nan. Ni guisij ga'i yo' huin
ruhuāj guchij guiman né'. ²⁴Hué
dan ni ngaa gan'an estado España,
ni guchi' ni'yā ni é re', ruhuāj aj. Ni
ngaa gahuin niā' ruhuāj nga ni é re',
ni huin ruhuāj si chraçuij ni é re' si
guisí estado España.

²⁵Sani yyaj ni gan'an xuman'
Jerusalén. Ni gan'anj chraçuī ni
ngüi nico' Yan'anj man xuman' daj.

²⁶Daj si gahuin sa' ruhua ni ngüi
man estado Macedonia nga estado
Acaya chraçuij ni sij san'anj ni
ngüi yaco ran' nico' Yan'anj mán
xuman' Jerusalén. ²⁷Ni gahuin
niā' ruhua ni sij sisi daj guiri' ni sij
ga'ui' ni sij rian ni sí'. Ni dugu'naj
gui'yaj ni sij. Daj si ga'ui' ni tsínj
israelita man xuman' Jerusalén
si-nuguan' Yan'anj rian ni sij huin
ni sij ni tsínj 'na' anéj chrej. Xi'í daj
hua niān chraçuij ni tsínj 'na' anéj
chrej ni ngüi yaco ran' nico' Yan'anj

mán xuman' Jerusalén. ²⁸Ni ngaa
guisij ganahuij si-sūnj nan naga'uij
san'anj daj rian ni ngüi man xuman'
Jerusalén, ngaa ni gachinj ni'yā
rian man ni é re'. Ngaa ni gan'an
estado España. ²⁹Ni ni'inj sisi ngaa
guisí rian man án re', ni gui'yaj
Cristo 'ngo sinduj nico ngāj. Ni
gahuin nica ruhua á re', gui'yaj si-
nuguan' sij.

³⁰Nicaj dugüi' daran' né' nga
Señor Jesucristo. Ni 'i ruhua
né' ni'yaj né' ni dugüi' né', 'yaj
Espíritu Santo huin ni é re' jnān
nga xica'ui. Ni achínj jni'yā rian ni
é re' sisi chraçuij ni é re' man'anj
gachinj jni'yaj né' rian Yan'anj
xi'ij. ³¹Gachinj jni'yaj ni é re' rian
Yan'anj sisi ganani man'anj rian
ni tsínj nun xuman' ruhua ni'yaj
Jesús man estado Judea. Ni gachinj
jni'yaj ni é re' sisi nahuin ra'a sa' ni
ngüi nico' Yan'anj man Jerusalén
san'anj ga'uij rian ni sij. ³²Hué
dan ni sisi ga'uej ruhua Yan'anj, ni
gahuin niā' ruhuāj ngaa guisij ni'yā
rian man ni é re'. Ngaa ni ga'ue
nari' nucuj daran' né' nga si-
nuguan' Yan'anj. ³³Yan'anj 'yaj sisi
hua din'inj ruhua niman daran' né'.
Ni huin ruhuāj sisi gane Yan'anj nga
daran' ni é re' aj. Amén.

Saludos personales

16 Guisij 'ngo xica'uij né' rian
man ni é re' gu'naj ún'
Febe. Ni nico' ún' Jesucristo. Ni 'yaj
sun ún' rian ni ngüi nico' Yan'anj
man xuman' Cencrea. ²Ni daj rún'
gu'yun né' nicaj dugüi' né' nga ni
ngüi xuman' ruhua ni'yaj Señor,
ni hué daj nahuin ra'a á re' ún'.
Ni chraçuij ni é re' daran' rasun

achin garasun ún!. Daj si nin' ruhua chracuij ún' ga'í ni ngüi. Ni chracuij ún' man'anj nej.

³Ni a'ní 'ngo nuguan' rian yun'unj gu'naj Priscila nga tsínj gu'naj Aquila huin nungüej nica sij si 'yaj sun nuguan'an ngāj xi'í si-sun Cristo Jesús. ⁴Ni ngaa guiran' man'anj 'ngo sayun, ni ga'uej ruhua nungüej nica sij gahui' sij xi'ij. Ni sé urinj naga'ui' si guruhua nungüej sij, saní hué daj 'yaj daran' ni ngüi nico' Yan'anj 'na' anéj chrej nej. ⁵Ni hué daj a'ní 'ngo nuguan' rian ni ngüi nico' Jesús nahuin yu' ducua nungüej nica sij. Ni a'ní 'ngo nuguan' rian tsínj gu'naj Epeneto huin sí' 'ngo tsínj 'i ruhuāj ni'yā. Ni huin sí' tsínj guxuman sini yan ruhua ni'yaj Jesús rian daran' ni ngüi man estado Acaya.

⁶Ni a'ní 'ngo nuguan' rian María. Daj si guiyaj sun nin' ruhua unj scanij ni é re'. ⁷Ni a'ní 'ngo nuguan' rian tsínj gu'naj Andrónico nga Junias huin nungüej sij dugüi'ij. Ni gunun nungüej sij ducua' ngaa gunun nej. Ni 'yaj sa' Adrónico nga Junias scanij ni apóstol ni tsínj a'mi si-nuguan' Jesús rian ni ngüi. Ni ngaa achin guxuman ruhuāj ni'yā Cristo, ni hua guxuman ruhua nungüej sij. ⁸Ni a'ní 'ngo nuguan' rian tsínj gu'naj Amplias si 'i ruhuāj ni'yā sí' xi'í Señor. ⁹Ni a'ní 'ngo nuguan' rian Urbano, tsínj 'yaj sun ngāj xi'í Cristo. Ni a'ní 'ngo nuguan' rian tsínj 'i ruhuāj huin Estaquis nej.

¹⁰Ni a'ní 'ngo nuguan' rian tsínj gu'naj Apeles. Ni'i né' sisi digyán sa' sí' si xuman ruhua sí' ni'yaj sí' Cristo. Ni hué daj a'ní 'ngo nuguan' rian ni dugüi' Aristóbulo nej. ¹¹Ni

a'ní 'ngo nuguan' rian Herodión huin sí' dugüi'ij. Ni a'ní 'ngo nuguan' rian ni dugüi' Narciso huin ni sij ni tsínj xuman ruhua ni'yaj Señor. ¹²Ni a'ní 'ngo nuguan' rian yun'unj gu'naj Trifena nga Trifosa huin nungüej ún' yun'unj 'yaj sun rian Señor. Ni hué daj a'ní 'ngo nuguan' rian Pérsida si 'i ruhua né' ni'i né' unj. Ni ducu guiyaj sun unj si-sun Señor. ¹³Ni a'ní 'ngo nuguan' rian Rufo, tsínj ganacui Señor. Ni hué daj a'ní 'ngo nuguan' rian nni sí' nej. Daj si rún' 'yaj 'ngo nni né' daj guiyaj ún' nga man'anj.

¹⁴Ni a'ní 'ngo nuguan' rian tsínj gu'naj Asíncrito nga Flegonte nej, Hermas nej, Patrobas nej, Hermes nej, nga daran' ni ngüi nico' Yan'anj mán nga ni sij nej. ¹⁵Ni hué daj a'ní 'ngo nuguan' rian tsínj gu'naj Filólogo nga Julia nej, nga nungüej xica'uij Nereo nej, Olimpás nej, nga daran' ni ngüi nico' Yan'anj mán nga ni sij. ¹⁶Ga'nij a ni é re' 'ngo nuguan' rian ni dugüi' ni é re'. Ni garun du'ua ni é re' ni dugüi' ni é re' xi'í si nicaj dugüi' ni é re' rian Cristo. Daran' ni ngüi mán nin' gachra' nico' Cristo a'níj 'ngo nuguan' rian ni é re' aj.

¹⁷Ni achínj jni'yā rian ni é re' huin ni jnún' nga ni xica'uí' sisi guini'yaj sa' ni é re' nga ni ngüi 'yaj si unun' ni dugüi' ni é re'. Ni chran' yun'unj ni sij ni é re' xi'í nuguan' sa' gahuin chrún ni é re'. Guxun anéj ni é re' man'an án re' rian ni ngüi daj. ¹⁸Daj si sé si 'yaj sun ni sij rian Señor Jesucristo. Saní maan si 'yaj sun ni sij si aran' ruhua riqui ni sij. Sa' nagui'yaj ni sij si-nuguan' man'an ni sij. Saní digya' yun'unj

ni sij niman ni ngüi nun ni'i sa'
nga nuguan' daj. ¹⁹Ni'i daran' ni
ngüi sisi dagahuin sa' ni é re' si-
nuguan' Yan'anj. Xi'í daj ni gahuin
niá' ruhuāj xi'í ni é re'. Ni huin
ruhuāj sisi gahuin chrun ni é re'
gui'yaj ni é re' ni nuguan' sa'. Sani
na'uej ruhuāj sisi gahuin chrun ni
é re' gui'yaj ni é re' si xi'í. ²⁰Ni 'yaj
Yan'anj si hua din'inj ruhua né'. Ni
rá'yanj gui'yaj gana ni é re' rian
sichre, gui'yaj Yan'anj. Ni huin
ruhuāj si gui'yaj Señor Jesucristo
sinduj rian ni é re' aj.

²¹Ni a'níj tsínj gu'naj Timoteo
'ngo nuguan' rian ni é re' huin sí'
tsínj 'yaj sun nuguan'an ngāj. Ni
a'níj tsínj gu'naj Lucio nga Jasón
nej, Sosípater nej, 'ngo nuguan' rian
án re' huin ni sí' ni dugüi'íj. ²²Ni
man'ānj huin tsínj gu'naj Tercio,
arūn si-nuguan' Pablo nan. Ni hué
daj a'ní 'ngo nuguan' rian ni é re'
xi'í Señor. ²³Ni a'níj tsínj gu'naj
Gayo 'ngo nuguan' rian ni é re' nej.
Ni nněj ducúá sij. Ni chra'cuíj sij
ducúá sij sisi ga'na' daran' ni ngüi
nico' Yan'anj. Ni hué daj a'níj tsínj
gu'naj Erasto 'ngo nuguan' rian ni é
re' nej. Hué sí' huin tesorero xuman'

nan. Ni a'níj Cuarto 'ngo nuguan'
rian ni é re' nej. ²⁴Ni huin ruhuāj
sisi gui'yaj Jesucristo sinduj rian ni
é re' huin sí' Señor nicaj sun rian
né'. Amén.

Doxología final

²⁵Ni ga'ue gui'yaj Yan'anj si
gahuin nica niman ni é re' xi'í
nuguan' natāj rian ni é re' huin
nuguan' sa' xi'í Jesucristo. Asij
ngaa ná, ni nun ga'ue xacaj ni ngüi
cuenta xi'í si-nuguan' Yan'anj. Sani
yyaj ni digyán Yan'anj rian ni ngüi
daj hua nuguan' daj. ²⁶Ni hua yya
digyán Yan'anj nuguan' daj rian ni
ngüi. Daj si ga'níj Yan'anj sun rian
ni tsínj ga'mi si-nuguan' Yan'anj
asij ná sisi garun ni sij si-nuguan'
Yan'anj rian yanj. Yyaj ni ni'i daran'
ni ngüi man nin' gachra' chruhua
xungüi daj hua nuguan' guixij
hui daj. Ni huin ruhua Yan'anj sisi
guxuman ruhua ni sij si-nuguan'
Yan'anj. Ni dagahuin ni sij nuguan'
daj nej. Ni nne niganj Yan'anj.
²⁷Urin Yan'anj huin. Ni ni'i sa'
Yan'anj daran'anj. Ni ga'mi sa' 'ueé
niganj né' rian Yan'anj nga xi'í
Jesucristo nej. Amén.